

TOKSAVE!
 Wantok Niuspepa i nau stap antap long opis bilong Dove travel 4-mail.
 Section 24, Lot 25, Angau Drive (CNR Lahara Avenue Boroko)

WINIM K1,000 MAMA FLAME MEKIM BILUM KOMPETISEN

Mekim bilum bilong yu yet wantaim Flame Flour mak. Laikim Facebook peis na postim foto bilong yu wantaim bilum yu karim na yu bai gat sans long winim. (Fopela inap long winim. Wampela long wanwan region)

go to FlameFlourPNG on Facebook



TOTAL aset veliu o mani mak bilongol bisnis bilong gavman nau i winim moa long K20 bilien.

Dispela em i veliu bilong olgeta aset bilong 11-pela stet on entaprais (SOE) olsem Telikom PNG, PNG Ports, PNG Power, Post PNG, DataCo PNG, Motor Vehicle Insurance, Water PNG, Eda Ranu, Air Niugini, National Airports Corporation, na National Development Bank.

Dispela veliu em i no toktok long Kumul Mineral (Petromin) na Kumul Petroleum Holdings (NPCP), we tupela kampani bilong gavman i lukautim ol invesmen bilong gavman long maining na petroleum sekta.

Dispela olgeta kampani i stap aninit long lukluk bilong Kumul Consolidated Holdings Limited (KCH), we pastaim ol i save kolim Independent Public Business Corporation (IPBC).

Siaman bilong KCH, Paul Nerau, i tok hatwok bilong Minista bilong Pablik Entaprais na Stet Investments bipo, Ben Micah, i bin lukim KCH i karim gutpela kaikai.

“Taim Mista Micah i kamap Minista bilong Pablik Entaprais na Stet Investmen long yia 2012 i kam inap nau long 2016, total veliu bilong aset bilong ol SOE i stap long Jeneral Bisnis Trast we KCH i save menesim, i stap nau long moa long K20 bilien,” Mista Nerau i tok.

Mista Nerau i mekim dispela toktok las wik Trinde long Pot Mosbi long taim bilong henova tekova seremoni bilong olupela na nupela Minista bilong Pablik Entaprais na Stet Investmen.

I go moa long pes 2...

Ol gavman bisnis i winim K20 bilien



SEKIM PAWA KEBOL

Ol save lain bilong pawa kebol bilong PNG Pawa i wok long sekim ol bikipela pawa kebol i ran long Rauna i kam long Mosbi siti. Ol i yusim spesel helikopta we i gat ol masin i stap insait long sekim ol pawa kebol. Planti pawa blekaut i wok long kamap long Mosbi long wanem ol wokman bilong PNG Pawa i mekim bikipela wok long Kanudi pawa haus. *Poto Nicky Bernard.*

INSAIT Putim mani long MiBenk em gutpela tingting - P6

Sensasip kisim bikipela helpim long Gavman - p7



Australia-China-PNG Trilateral Malaria Projek p10




Supporting PNG MADE

Friends should be everywhere

You can reach over 93% of PNG on the friendlier network.

76003555 or 1555
 connect@bmobile.com.pg

Connect with us on

www.bmobile.com.pg

Ol gavman bisnis i winim K20b

I kam long pes 1...

"Mipela i amamas long Minista Micah i mekim bikpela wok long larim KCH i strongim bisnis. Aninit long lukaut bilong em, ol SOE i mekim moa mani we nau mani mak bilong olgeta kampani aninit long KCH i go antap long K20 bilien insait long 4-pela yia tasol," Mista Nerau i tok.

Mista Nerau i tok ol SOE i bin stap nambaut long laik bilong ol yet na i no bin gat wanpela gutpela lidasip long politikel level long menesim gut ol SOE.

"Aninit long lidasip bilong Minista Micah, mipela i lukim moa developmen i kamap na veliu bilong ol SOE na Stet Investment i kirap.

"Ol pastaim minista na menesmen bilong IPBC i bin ranim daun dispela kampani. Veliu bilong IPBC i bin stap long K5 bilien long yia 2012 tasol Minista Micah i bungim olgeta SOE na kirapim veliu bilong olgeta i go moa long K20 bilien," Mista Nerau i tok.

Em i tok Mista Micah i bin kirapim plen bilong kampaim Kumul kampani na bungim olgeta SOE aninit long wanpela strongpela Kumul kampani husat i gat planti save manmeri na manmeri bilong mekim hatwok.

"Aninit long Micah, Pot Mosbi sip bris bai kamap bikpela taim ol i muvim i go long Mtukea na Lae sip bris tu bai kamap bikpela. Dispela tupela sip bris bai larim moa bisnis i kirap na ikonomi bilong PNG bai kirap tu."

Minista Micah i lusim ol wok bilong dispela ministrii go long han bilong nupela minista, husat i kisim ples bilong em.

Memba bilong Hagen na pastaim Minista bilong Trensport, William Duma, em i nupela minista husat bai lukautim KCH na olgeta SEO kampani.

Henova tekova seremoni bilong tupela minista i bin kamap long ai bilong 11-pela SOE kampani we nau Minista Duma bai lukluk long en.

Mista Micah bai kamap nupela Minista bilong Petroleum na Eneji. Mista Dumai bin stap Minista bilong Trensport na Infrastraksa. Pastaim tru, em i bin stap Minista bilong Petroleum na Eneji.

Mista Nerau i tok dispela senis bilong Minista bai no inap bringim wanpela nogut samting i kam insait long KCH.

"Minista Micah i kisim i go aut moa ekspirens em i kisim long Pablik Entaprais na Stet Invesments.

"Long wankain taim, Minista Duma tu i kisim i kam insait moa ekspirens em i bin kisim long pastaim wok bilong en olsem Minista bilong Trensport na Infrastraksa na Petroleum na Eneji.

Em i tok taim KCH i wok long kirapim planti ol infrastraksa projek long kantri olsem, ekspirens bilong Minista Duma bai helpim KCH long pinisim gut ol infrastraksa projek olsem Ramu 2 pawa projek, Lakatoi Siti Projek, na Pot Mosbi Sewerage Sistem Aporet Projek.

Polye no bilip long K20 bilien aset veliu bilong KCH

OPOSISEN Lida Don Polye i no bilip long tok-tok bilong Siaman bilong Kumul Consolidated Holdings Limited (KCH), Paul Nerau, taim em i tok total aset veliu bilong ol stet on entaprais (SOE) o ol kampani bilong gavman nau i stap long K20 bilien.

Mista Polye i tok Oposisen i no bilip long dispela toktok bikos ol SOE i

no save mekim bikpela winmani olgeta taim.

Em i tok ol SOE i wok long kisim taim stret long gro na planti taim ol i wok long putim ai long gavman long givim mani long helpim opresen bilong ol.

"Mipela inap long bilip sapos wanpela indipenden odita i bin glasim gut dispela total aset veliu bilong ol SOE. Dispela toktok bilong siaman Nerau

em i no stretpela toktok.

"PNG Power em i wanpela SOE we i no save mekim gut winmani na ol arapela SOE tu i no save mekim gut winmani.

"Gavman i sot long mani na i wok long askim ol SOE long tokaut long hamas winmani ol i mekim tasol mi no lukim planti SOE i givim moa winmani long gavman," Mista Polye i tok.



Oposisen Lida Don Polye.

Telikom baim pinis EMTV

NAMBA WAN televisen stesin bilong PNG, EMTV, i kamap wanpela han kampani bilong Telikom PNG Limited.

Sif Eksekutiv Opisa (CEO) bilong Telikom PNG, Michael Donnelly, i tok Telikom PNG i baim pinis mama kampani bilong EMTV, Media Niugini Limited, long K20 milien.

Mista Donnelly i tok olgeta pepa wok long larim Telikom PNG i kamap nupela papa bilong Media Niugini kamap pinis na nau EMTV i kamap olsem wanpela sabsideri kampani bilong Telikom PNG.

EMTV i bin stap olsem wanpela sabsideri kampani Fiji TV,

tasol long mun Oktoba las yia, Fiji TV i bin laik salim EMTV.

Telikom PNG i bin wanbel long baim na em i bin givim K2 milien pastaim long Fiji TV long soim olsem em bai baim dispela namba wan TV stesin bilong PNG.

Las wik ol eksekutiv bilong

Telikom PNG, Media Niugini na Fiji TV i bin bung long RaMarama Haus long Suva, Fiji na ol i stretim ol pepa wok long larim Telikom i kamap nupela papa bilong EMTV.

Mista Donnelly i tok ol manmeri PNG i amamas olsem Telikom PNG i baim pinis EMTV.

Santos laik salim PNG LNG sea

OIL na ges kampani bilong Australia, Santos, i tingting long salim sampela sea bilong em long PNG LNG Projek.

Santos i les long salim olgeta sea bilong em long PNG LNG Projek tasol em i wok long painim ol baia long salim 3.6 pesen sea tasol.

Sapos Santos i painim wanpela kampani husat i wanbel long baim dispela sea bilong em long PNG LNG Projek, em bai mekim K3.17 bilien.

Mani mak o veliu bilong dispela 3.6 pesen em i K3.17 (A\$ 1.5 bilien). Santos i bin autim sampela tok win olsem wanpela kampani bilong Japan, ol i kolim Marubeni, i laik baim dispela 3.6 pesen sea.

Santos em i namba 4 bikpela projek patna long PNG LNG Projek bihain long ExxonMobil, Oil Search, na Kumul Petroleum Holdings.

Santos i gat 13.6 pesen sea long dispela bikpela ges projek long PNG. Pastaim Sif Eksekutiv Opisa (CEO), David Knox, i bin wok hat tru long stretim ol toktok long larim San-



Bikpela tenk bilong holim LNG ges long PNG LNG Plent sait ausait Pot Mosbi.

tos i kisim sampela sea long PNG LNG Projek.

Tasol taim Mista Knox i lusim wok na nupela CEO Kevin Gallagher i kisim ples bilong em, Santos i nau laik salim dispela 3.6 pesen sea long PNG LNG Projek.

Mista Gallagher i tok Santos i laik katim daun opresenal kos o mani bilong ranim ol opresen bikos prais bilong wel na ges i pundaun go daun

long intenesenel maket.

"Mipela i laik katim daun kos bilong opresen. Sapos mipela i no salim dispela 3.6 pesen sea long PNG LNG Projek, bai mipela salim sampela ol sea bilong Santos long sampela arapela projek long Australia," Mista Gallagher i tok.

Mista Gallagher i tok Santos i wok long katim daun namba bilong ol wok manmeri long

Cooper Basin na Gladstone LNG long Australia.

"Mipela i tingting long salim sampela ol sea bilong Santos long Kipper sapos i nogat wanpela kampani i les long baim sea bilong mipela long PNG LNG Projek," Mista Gallagher i tok.

Wankain taim, Kumul Petroleum Holdings Limited bai salim 4.27 pesen bilong 16.57 pesen sea ol holim aninit long Kroton

Namba 2.

Ol papagraun na provinsal gavman bilong Hela, Westen, Sauten Hailans, Galp na Sentral i wok long toktok long baim dispela 4.27 pesen sea bilong Kroton Namba 2 long PNG LNG Projek.

Tasol ol papagraun na provinsal gavman i no gat mani long baim dispela sea.

Sapos ol i bin kisim ol royalti mani bilong PNG LNG Projek, ol inap long gat sampela mani long baim dispela sea.

Tasol ol i no kisim ol imani yet bikos gavman i wok long sekim gut na glasim ol tru tru papagraun stret, husat inap long kisim ol royalti mani bilong PNG LNG Projek.

Wanpela tras akaun long Bank ov PNG (Sentral Benk) i holim ol royalti mani na dispela tras akaun i wok long kisim na holim ol mani wan wan sipmen o LNG kago i mekim.

ExxonMobil i tok ol i salim moa long 160 sipmen bilong LNG i go long maket long Esia. Tasol PNG i no kisim yet wanpela mani bilong LNG.

Mi bin kirapim 11-pela 'sik bebi'- Micah

TAIM total aset veliu bilong ol Stet on entaprais (SOE) i go antap long moa long K20 bilien, dispela i soim olsem sampela manmeri i bin wok hat tru long bringim gutpela senis i kam insait long ol bisnis bilong gavman.

Olpela Minista bilong Pablik Entaprais na Stet Investmen, Ben Micah, i tok em i no bin wanpela bikpela samting long rausim nem nogut, bungim olgeta SOE, kirapim nupela bisnis polisi na plen, putim o nupela wok manmeri na kamapim Kumul Consolidated Holdings Limited (KCH) i kamap wanpela strongpela kampani long PNG.

"Mi bin kirapim 11-pela sik bebi i stap long imejensi wot o ICU (intensiv kea yunit). Ol i bin stap long mak bilong lusim laip na i dai tasol mi givim bek laip bilong ol na nau ol i stap strong na helti olsem ol arapela manmeri," Mista Micah i tok.

Mista Micah i mekim dispela tok piksa long soim olsem 11-pela SOE o kampani bilong gavman i bin stap long mak long lusim bisnis taim Praim Minista Peter O'Neill i bin makim em i kamap nupela Minista bilong Pablik Entaprais na Stet Investments long yia 2012.

Ol dispela 11-pela SOE em ol Telikom PNG, PNG Ports, PNG



Paul Nerau (raithan) i givim wanpela presen i go long Minista Ben Micah (Ilephan) taim nupela Minista, William Duma, i lukluk.

Power, Post PNG, DataCo PNG, Motor Vehicle Insurance, Water PNG, Eda Ranu, Air Niugini, National Airports Corporation, na National Development Bank.

"Ol i bin stap nabaut nabaut. Sampela i no save mekim winmani tasol ol i save kisim strong long mani i kam long gavman.

"Sampela i bin sot long mani long ranim ol opresens na klostu i pasim kampani. Sampela kampani

i bin stap olsem 'kes kau' bilong sampela ol pastaim memba na gavman minista, husat i save yusim ol SOE long mekim mani bilong ol na ol politikal poroman na bisnis patna bilong ol.

"Total aset veliu bilong dispela olgeta 11-pela SOE i bin stap long K5 bilien tasol long yia 2012.

"Tasol bihain long 4-pela yia total aset veliu bilong olgeta SOE i stap long K20 bilien na mi amamas

stret long olgeta wok yumi bin mekim long kirapim ol dispela kampani bilong gavman," Mista Micah i tok.

Em i mekim dispela toktok las wik Trinde taim em i laik lusim wok bilong em olsem Minista bilong Pablik Entaprais na Stet Investments na kamap nupela Minista bilong Petroleum na Eneji.

Mista Micah, husat i bin stap siaman bilong Praivetaisesen Komisn long

praivetaisim ol dispela 11-pela SOE, i tok ol i bin gat gutpela tingting long kirapim ol dispela kampani.

Tasol ol manmeri na ol pastaim minista husat i bin lukautim IPBC na ol dispela SOE i no bin lukautim na ranim gut ol dispela kampani.

"Mi bin kirap nogut olsem sampela bilong ol i bin gat planti dinau mani. PNG Pawa em i wanpela SOE we em i save lusim planti mani

stret bikos planti manmeri na ol bisnis haus i save abrusim pawa bil.

"Wankain olsem, mi bin kirap nogut olsem pastaim CEO bilong Post PNG i bin salim olgeta namba wan aset na ol propeti bilong Post PNG.

"Pastaim Minista i bin makim ol bisnis patna na ol politike kroni bilong em yet i kamap bos bilong ol sampela SOE.

"Praim Minista Peter O'Neill i bin lukim dispela na em i bin givim dispela bikpela wok long mi long kirapim gen ol dispela namba wan SOE bilong dispela kantri," Mista Micah i tok.

Em i tok IPBC i no bin gat wanpela bisnis polisi tasol taim em i kamap minista, em i makim ol save manmeri tasol long ranim Dipatmen ov Pablik Entaprais na Stet Investments, na ol dispela nupela wok manmeri i kirapim nupela bisnis polisi.

"Dispela polisi i lukim IPBC i senis na kamap KCH. Dispela nupela polisi lukim ol fit manmeri na save manmeri tasol i kamap bod memba na senia menesmen tim.

Dispela i karim kaikai na mi nau olgeta bisnis bilong gavman i ran gut tru, Mista Micah i tok.

Mista Micah i tok em bai stap redi long helpim nupela Minista, William Duma, sapos em i nidim sampela helpim long nupela wok bilong em.

Gavman mas kirapim teminal bilong Komo ples balus

BIKPELA Komo ples balus long Hela Provins i mas gat teminal na ol arapela samting wankain olsem ol bikpela intenesenel ples balus i save gat.

Dispela em i singaut bilong Memba bilong Komo-Margarima, Francis Potape, husat i laikim gavman long kirapim dispela ples balus i kamap wanpela bikpela ples balus insait long PNG na long Saut Pasifik.

Mista Potape i salensim gavman long lukluk i go insait long dispela ples balus bikos dispela ples balus i ken senisim laip bilong ol manmeri na bringim planti gutpela samting sapos em i kamap gut tru.

"ExxonMobil i yusim bikpela mani long kirapim dispela ples balus. Hela provinsal gavman na nesanel gavman i mas lukluk long kirapim dispela bikpela ples balus

bilong yumi na mekim dispela ples balus i redi long komesal sevis," Mista Potape i tok.

Em i tok gavman i nau larim ol PNG Difens Fos i yusim long mekim ol sekyuriti wok bilong PNG LNG Projek na long trening.

"Dispela em i gutpela samting. Yumi mas kirapim nesanel sekyuriti bilong PNG. Na yumi mas kirapim moa bisnis tu.

"Mi laik askim Praim Minista Peter O'Neill long kirapim Komo ples balus. Sapos gavman i ken kirapim Kagamuga ples balus long Mt Hagen, Hoskins ples balus long Kimbe, na Gurney ples balus long Alotau, em i mas kirapim Komo ples balus tu.

"ExxonMobil i stap long Komo. Oil Search i stap long Komo. HGDC i stap long Komo. Planti ol biknem kampani i stap long Komo.



Bikpela balus i pundaun long Komo LNG ples balus. Poto: Intenet

"Ges na oil bilong Komo na Hela i sapatim ikonimi bilong PNG. Gavman mas kirapim bikpela tem-

inal bilding long larim Komo i kamap wanpela bikpela intenesenel ples balus we i ken kisim ol

bisnis manmeri na turis i kam insiat long kantri," Mista Potape i tok.



are you **Savings** fit?

Give your savings a workout by opening a **PLUS SAVER** or **TERM DEPOSIT** account before 31st March, 2016.

Weekly Smartphone Giveaway:

Simply **open** a new **BSP Plus Saver** or **Term Deposit** account to be eligible.



www.bsp.com.pg



Tisa na sumating insait long wanpela woksop. Wantok fail foto.

Mani bilong LNG papagraun stap gut

OLGETA benefit mani ol lenona o papagraun bilong wan wan projek eria insait long 5-pela provins we PNG LNG Projek kamap i stap gut tru.

Praim Minista Peter O'Neill i tok olgeta royalti mani na ol arapela benefit mani bilong ol papagraun long Westen, Sauten Hailans, Hela, Galp na Sentral provins i stap gut tru stret na i no gat wanpela man i kisim dispela mani bilong ol papagraun.

"Olgeta benefit mani bilong ol papagraun na bilong ol pipel bilong yumi long PNG LNG Projek i stap gut tru. No gat wanpela man bai yusim, stilim, salim o kisim i go long sampela hap. Olgeta mani bilong ol papagraun i stap gut tru," Mista O'Neill i tok.

Mista O'Neill i mekim dispela toktok long bekim toktok bilong Oposisen

Lida Don Polye, husat i tok gavman i tingting long yusim dispela 4.27 pesen Kroton Ekwiti bilong ol papagraun long kisim sovren bond.

Mista Polye i tok gavman i wok long yusim Kumul Petroleum Holdings Limited (KPHL) long kisim na haitim ol mani kantri inap kisim longtaim long PNG LNG.

Mista Polye, husat i kolim Kumul Petroleum olsem 'pepa kampani' bilong gavman, i tok Kumul Petroleum i wok long haitim LNG mani na nau em i tingting long paulim ol papagraun na givim dispela 4.27 pesen i go bek gen long gavman.

Mista O'Neill i tok ol papagraun i mas painim mani long baim dispela 4.27 Kroton Ekwiti, we ol i bin wanbel long ambrela benefit sering agriment (UBSA) long yia 2009.

"Gavman bai bihainim

tok promis long larim ol papagraun i baim dispela ekwiti sea na kisim benefit long PNG LNG Projek," Mista O'Neill i tok.

"Gavman i les long lukim ol kon man na giaman fainens kampani husat i wok long paulim ol papagraun. Mipela i les long dispela kain paul pasin i kamap," Mista O'Neill i tok.

Las wik, opreta bilong PNG LNG Projek, Exxon-Mobil i salim 160 LNG kago i go long Asian maket long Taiwan, Saina na Japan.

Dispela 160 LNG kago i karim 11.7 milien tan bilong ges ol i kisim long Hides long Hela Provins.

Wanpela mausman bilong ExxonMobil i tok dispela bikpela oil na ges kampani bilong Amerika i gat ol plen long skruim PNG LNG Projek wantaim namba tri tren.

"Mipela i wok long putim moa mani long

painim nupela ges risos long larim PNG LNG Projek i kamap bikpela moa," em i tok.

Wanpela bilong dispela ol plen em long mekim eksplaresen na drilim Muruk wel klostu long Juha na long P'nyang fil long Westen Provins.

Em i tok dispela tupela risev ges fil long Muruk na P'nyang bai givim bikpela sans long apim level bilong ges saplai long kirapim pawa saplai long PNG na long kisim moa ges long skruim PNG LNG Projek i go moa wantaim namba tri tren.

"Mipela i wokbung wantaim gavman long kisim Petroleum Development Laisens (PDL) na Paipain Laisens (PL) bilong P'nyang ges fil, we ges i kam long dispela fil bai kamapim wanpela 50 megawat pawa stesin klostu long LNG Plent sait," em i tok.

Noken sasim projek fi

...Wetim NEC Disisen

OL skul i noken sasim ol projek fi inap long Nesenel Eksekutiv Kaunsel (NEC) i mekim wok glasim long en.

Edukesen Seketeri, Uke Kombra i salim wanpela toksave sekula Namba 5 o pas i go long olgeta Provinsal Edukesen Edvaise, ol Gavaning Kaunsel, ol Bod Menesmen, ol Skul Prinsipel, ol Het Tisa na ol Stendet Opisa long dispela wik Mande .

Seketeri Kombra i wokim dispela sekula aninit long Seksen 28 na 29 long Edukesen Ekt 1983, bungim wantaim Namba 13 ol i wokim long 1995.

Em i tok as long Sekula No 4 bilong kaunsel ol i kamapim long dispela yia tasol ol i kolim 2016 projek fi Polisi na Komplaiens, ol i holim bek dispela inap long NEC i givim disisen bilong em.

Seketeri Kombra i tok ol i tokim pinis ol skul long dispel a kantri long no ken bihainim dispela tok-tok long sekula 4 we i tok long go het na sasim ol projek fi inap NEC i skelim na glasim ol samting gut, nae m i wokim disisen. Ol samting long dispela sekula em ol i bin mekim wanpela wik i go pinis.

Seketeri Kombra i tok planti skul i paul long as tingting bilong Tuisen Fi Fri (TFF) Polisi, tasol ol skul i wok long sasim ol papamama ol skul fi na projek fi long putim ol pikinini bilong ol i go long skul.

Em i tok planti i wok long sasim ol skul ovarim mak we Nwsenel Edukesen Bot (NEB) i makim, na ol i asua long wokim dispela bikos

dispela i brukim ol daireksen Gavman na NEB i woikm.

"TFF em i wanpela bikpela gavman polisi. Ol bosman bilong ol skul i mas luksave olsaem Gavman bilong PNG i gat komitmen long baim TFF i go long olgeta sumatin husat i go long skul, stat olong Prep level i go antap long Gred 12 level, ol dispela long Vokesenel Edukesen na Trening, Fleksibel Open Distens Edukesen na 9inklusiiv edukesen. Gavman i peim ful TFF ol i bin katim long dispela wok long 2012 inap long las yia, 2015," Dokta Kombra i tok.

Em i tok sampela skul i wokim krangi pinis sasim projek fi na ol stekholda nau i kamapim ol kain tingting pinis.

Em i tok bikos long dispela, Edukesen Dipatmen, olsem wanpela ejensi i gat wok na komitmen long dispela samtiung bai kisim i go bek dispela long Nesenel Edukesen bod Maksimum Projek Fi Limit ol i tok oraitim pinis long 2015 na ol arapela fi moa i go long NEC long wokim disisen long en na edvaise.

"Inap NEC i wokim disisen, nogat skul o kolis i mas sasim projek fi.

Sapos sampela skul i wok long sasim yet ol projek fi, ol i mas holim bek ol dispela mani inap NEC i toktok na wokim disisen bilong en long dispela," Dokta Kombra i tok.

Em i tok olgeta sumatin i mas go insait na stap long skul long skul.

Hela les long les manmeri

HELA Provinsal Administrata William Bando i tok Hela Provins bai no inap givim sans long ol pablik sevan husat i save les long wok tasol stap nating na kisim stilim mani bilong gavman.

Mista Bando i mekim dispela tok-tok bihain long ektiting Polis Stesin Komnada bilong Tari, Daniel Yangen, i givim tok lukaut long rausim moa long 50 polis manmeri husat

i save brukim lo na mekim nabaut nabaut.

Mista Bando i tok provinsal administresen i stopim pei bilong moa long 90 manmeri husat i no save stap long provins na mekim wok bilong gavman.

Em i tok long mun Ogas las yia, provinsal administresen i bin rausim 57 manmeri long gavman peirol bikos ol dispela pablik sevan i bin stilim mani bi-

long gavman i stap.

"Plantim manmeri i no save wok na kisim pot nait pei nating. Bai mi putim nem bilong ol ples klia long niuspepa na larim ol yet i lukim na stretim ol yet wan wan," Mista Bando i tok.

Mista Bando i tok Hela em i nupela provins na em i no nidim ol les manmeri husat i no save wok tasol husat i tingting long stilim mani bilong gavman.



Praim Minista Peter O'Neill wantaim ol biklain long taim bilong komisnim LNG Projek long yia 2014.

Wanem taim bai gavman opim gen National Narcotics Bureau?

OPOSISEN Lida Don Polye i singautim gavman long opim gen Nesanel Nakotiks Buro (National Narcotics Bureau) bikos kantri i wok long bungim hevi taim planti yangpela manmeri i wok long smokim mariwana na dring hombru.

Mista Polye i tok em i mekim dispela singaut bikos em les long harim ol yangpela manmeri i dring hombru na stim, na smukim mariwana long Krismas na Nu Yia.

NNB em i wanpela ki gavman ejensi i stap aninit long lo na jastis sekta. Em i save mekim ol awenes toktok long skulim ol manmeri i no ken smokim mariwana na dring stim o hom bru.

Gavman i bin luksave long dispela namba wan wok NNB i save mekim na i bin katim na givim K4.3 milien aninit long 2016 Nesanel Baset tasol nau yet opis i no op gen.

“Mi harim olsem NNB opis i pas. Wanem taim bai gavman i opim gen dispela opis. Planti ol yangpela manmeri i wok long kirapim ol hevi bilong lo na oda taim ol i smokim mariwana na dring hombru,” Mista Polye i tok.

Em i askim ol papamama long lukautim gut ol pikinini na stopim ol long dring hombru na smokim spakbrus.

“PNG i no gat wanpela juvenail rihebilitesen senta long skulim gut ol yangpela pikinini sapos ol i smokim mariwana o dring hombru,” Mista Polye i tok.

Em i mekim dispela toktok bi-



Katun bilong Jada Wilson long spak brus.

hain long ol polisman i bin holim sampela yangpela sumatin long Lae, Morobe Provins.

Polis i bin sasim ol dispela sumatin bikos ol liklik manmeri tumas long dring bia, na tu ol i bin brukim lo.

Las yia, Sif Seketeri bilong Gavman Sir Manasupe Zurenuoc i bin tok Nesanel Eksekutiv Kaunsil (NEC) i rausim pinis dairekta jeneral na i tok long makim nupela man long bosim dispela gavman ejensi tasol i no kamap yet.

Sir Manasupe i bin tok em i kisim olgeta pawa bilong dairekta jeneral o bos bilong NNB.

Dispela pawa bai go bek taim NEC i makim nupela bos long lukautim dispela opis.

Ol baset pepa bilong 2016 Ne-

senel Baset i luksave olsem NNB em i wanpela ki lo na jastis ejensi tasol dispela opis i bin pas long Jun 2014.

Papagraun askim long maining projek

WANPELA papagraun bilong Mt Kare gol-silva maining i askim gavman long stretim ol pepa wok hariap na kirapim dispela maining projek bikos ikonomi bilong kantri i nidim mani long ran gut.

Dispela papagraun, husat i les long kolim nem bilong en, i tok gavman i mas kisim i kam insait wanpela nupela divelopa na kirapim dispela maining projek bikos kantri i nidim mani taim prais bilong ol komoditi samting i go daun.

“Mi save olsem kantri i nidim moa mani long sapotim foren risev na bekim dinau gavman i kisim long ol bikpela intenesenel benk.

“Foren risev bilong PNG i go daun. Dispela em i wanpela gutpela sans long kirapim Mt Kare gol-silva

projek na larim mani gavman bai kisim long dispela projek i ken sapotim ikonomi bilong PNG long dispela taim no gut,” dispela papagraun i tok.

Em i tok ol papagraun i redi tasol long wokbung wantaim wanpela gutpela divelopa husat i laik helpim pipel bilong Enga na Hela wantaim.

“Gol na silva em i stap long graun bilong Hela na Enga wantaim. Mipela Hela na Enga i brata, wanpela man tasol i bin karim mipela. Gavman bilong Enga Provins and Hela Provins wantaim Nesanel Gavman i mas sapotim manmeri bilong tupela provins wantaim.

“Mipela bai amamas na skelim benefit gut sapos nesanel gavman i kisim i kam

insait wanpela gutpela divelopa, husat bai kirapim ples, mekim rot na bris, skul na haus sik na kisim wok mani i kam insait long ples.

“Manmeri long Hela na Enga wantaim i mas kisim benefit. Tupela provinsal gavman wantaim i mas wanbel na sapotim MRA na nesanel gavman long stretim ol pepa wok,” dispela papagraun i tok.

Mineral Risos Atoriti (MRA) i laikim ol papagraun bilong Mt Kare gol na silva maining projek long wokbung wantaim.

MRA i les long lukim ol papagraun bilong Mt Kare i kam raun long opis bilong MRA na askim kinkain samting long sait bilong Mt Kare gol na silva maining projek.

Wanpela wokman bilong MRA i tok gavman i no luk-

save yet long husat ol man, grup o klen i papagraun tru bilong Mt Kare maining projek.

“Gavman i no luksave yet long ol papagraun tru bilong Mt Kare gol na silva maining projek. Mipela i laikim ol long sindaun gut na stretim ol yet pastaim,” em i tok.

Dispela wokman bilong MRA, husat i les long autim nem bilong en, i tok Nesanel Kot i bin karimaut midiesen long Julai na Ogas 2015 long painimaut ol klen husat i gat graun long ples we EL 1093 i stap.

“Ol papagraun long Hela na Enga sait wantaim i bin bung na dispela midiesen i painimaut 19 klen. Tasol gavman i no luksave yet long wanem klen em i papagraun,” dispela MRA

wokman i tok.

Mt Kare i no bikpela tasol em i namel sais maining projek na maining opresen inap long kamap long taim yet, tasol planti papagraun i wok long paulim gavman na maining kampani Summit Development Limited (SDL).

SDL em i wanpela liklik maining kampani bilong Australia na EL 1093 i stap wantaim em. Planti ol papagraun long Hela na Enga sait wantaim i tok SDL i bin mekim gutpela wok long kirapim dispela maining.

Mt Kare gol na silva maining projek i stap insait long boda bilong Enga Provins tasol sampela papagraun long Hela Provins sait tu i gat hap graun bilong ol i stap long dispela eria we Ekploresen Laisens (EL) 1093 i karamapim.

US gavman amamas long Vanuatu ileksen

GAVMAN bilong Yunaitet Stets i tok amamas long Ripablik bilong Vanuatu long ol i kamapim wanpela gutpela lleksen wantaim bel isi long Tunde 26, Janueri.

Toktok i kam long US Embesi long Pot Mosbi i tok, “Mipela i luksave olsem sampela taim ol i save gat sampela liklik wok paul i kamap long wei bilong vot, tasol bikpela lain pipel long n-Vanuatu i bin gat sans long tromoi vot bilong ol long balot bokis.

“Mipela i tok amamas long gutpela wok bilong Vanuatu llektorel Komisen bikos em i wanpela impoten ileksen bilong ol pipel bilong Vanuatu na long demokretik wok.” Mausman bilong US Embesi i tok.

Papagraun tingting planti taim ol wokman protes

OL PAPAGRAUN long Kurumbukari long Usino-Bundi long Madang we nikel main nau i stap long en, i laik lukim projek i kamap gut na bringim mani na noken bungim hevi.

Komyuniti lida na wanpela papagraun long main eria, Greg Tuma i tokaut olsem ol pipel bilong Kurumbukari i bin beten strong na stop long kaikai na bilip strong tru i go inap dispela kampani bilong China MCC i bin kamap na wokim dispela projek. Olsem na ol i no laik lukim ol developmen i popaia.

Mista Tuma, husat i save wok tu olsem supavaisa long Komyuniti Afes Dipatmen bilong Ramu NiCo long KBK i wokim dispela toktok bihain long wanpela protes em ol wokman i kamapim na no go wok stat long Fraide Januari 22 i go Fraide, Januari 29.

Ol wok lain i no wanbel long sampela samting ol i tok kampani i no mekim stret.

"Yunien em maus bilong ol wokman na em i gat rait aninit long lo long lukluk long wanem hevi i stap long sait bilong ol wok lain.

"Long lukluk bilong mi olsem papagraun, mipela no laik lukim Projek i pas na givim hevi gen long komyuniti husat i save kisim helpim long en," Mista Tuma i tok.



Greg Tuma i autim wari bilong ol pipel bilong Kurumbukari.

Mista Tuma i tok klia long ol wokman long KBK Main long Fonde, Januari 28 we Ramu NiCo kampani menesmen na ol opisa bi-

long Dipatmen ov Leba na Industrial Rilesins (DLIR) olsem olgeta wokman i mas go bek long wok taim ol eksekutiv bilong yunien i

bung na toktok i go kam wantaim ol opisa bilong DLIR.

"Yunien wantaim kampani mas mekim ol toktok insait long lo na

stretim ol toktok gut we bai mekim ol wokman na kampani tu i amamas," Mista Tuma i tok.

Em i tok tu olsem dispela projek em olsem laiplain bilong ol papagraun husat i save kisim ol sevis we pastaim ol i no save lukim long en.

Mista Tuma i gat bel hevi tu olsem dispela straik o protes yunien i kamapim i kamap long taim nogut we i lukim Projek i bungim bikpela hevi na salens taim komoditi prais i daunbilo na nikel prais tu i bagarap.

Em i tok dispela i ken kamapim bikpela fainansel hevi gen long kampani.

"Mi sori olsem kampani presiden bilong Ramu NiCo, Wang Jicheng i wok long painim fainansal helpim i stap long lukim Projek i go het na tu helpim long givim pe na ol famili bilong olgeta wokman i ken gat kaikai long tebol," Mista Tuma i tok.

Ol mausman bilong Ramu NiCo Alaid Wokas Yunien na kampani menesmen na ol opisa bilong DLIR i bin bung long Fraide, Januari 29 na i toksave long olgeta lain long givim taimlong ol i lukluk long 11-pela askim bilong yunien.

Narapela bung i kamap tude (Fonde, Febuari 4) long Madang.



Have you got your MiCard yet?

- ▶ MiCard is available from any branch of MiBank nationwide
- ▶ MiCard can be linked to a MiCash Mobile Wallet or Savings Account
- ▶ MiCards can be used with BSP ATMs and BSP POS agents
- ▶ MiCard is the Card of choice for ordinary Papua New Guineans



CALL MIBANK
 16789
www.microbank.com.pg

Putim mani long MiBank em i gutpela tingting!

MiBank i gat wanpela gutpela wei bilong kisim dinau ol i kolim MiLoan we ol i disainim bilong helpim ol lain husat i save wok na kisim pei, long kisim ol dinau bilong baim ol skul fi, yunifom, buk, steseneri, o projek fi.

Planti gavman dipatmen na praivet sekta kampani i save wok wantaim MiBank bilong bekim ol dinau wantaim ei bilong ol.

Em i no olsem ol fainans kampani, bikos MiBank inap long givim ol narapela fainans sevis prodak olsem seavings, insurens, mobail benking na long baim ol mani bilong ol arapela kantri.

I no longtaim i go pinis, MiBank i bin

kamapim wanpela nupela ATM na EFTPoS debit kat long bung wantaim BSP ilektronik benking netwok.

Dispela em i min olsem taim yu kisim wanpela dinau long MiBank, ol i ken putim mani bilong yu i go stret long Benk akaun bilong yu na yu inap long rausim mani bilong yu long wanpela ATM long wankain taim yet.

Olsem na em i gutpela tingting long kisim wanpela dinau mani long MiBank long ol edukesen wok bilong family bilong yu bikos MiBank inap long helpim yu long planti rot. Tingim tu olsem yu dinau mani long MiBank wantaim intres

mak bilong Benk yet.

Skelim gut ol lo bilong MiBank wantaim ol lo bilong ol fainans kampani nay u bai amamas long lukim olsem bai yu gat moa mani i stap yet long pe bilong yu long yu kisim i go bek bihain long yu bekim dinau bilong yu sapos yu kisim MiLoan dinau long MiBank.

Wanpela MiBank tim bai amamas tasol long kam long opis bilong yu na toktok wantaim yu long wanem ol rot ol inap long stretim bilong yu.

Sapos yu laik long save moa, yu ken salim email i go long miloan@microbank.com.pg o ring long MiBank kol senta long Digicel # 16789 (Ring Fri).



Ol woklain bilong Mibank i promotim benk bilong ol raun. Foto: Intanet

Intenesenel Red Cross skulim ol ples lain

INTENESENEL wokmeri bilong long narapela wei
Komiti bilong Red ICRC i bin go long bilong daunim ol
Kros (ICRC) opis Tari long Hela traibel pait na
long PNG i statim Provins na wok long lukautim ol
wok bilong wantaim ol bikpela sosel sevis
kamapim luksave komyuniti long olsem, haus sik,
bilong ol komyu- tripela ples; skul na ol nara-
niti long daunim Hoieba, Hangapu pela pablik sosel
ol birua na stap na Parinamu au sevis.
wantaim bel isi sait long Tari Dispela namba
long komyuniti taun. wan trening bi-
bilong ol long Dispela pro- long awenes i bin
namel bilong las gram em ICRC i kamapim long
mun. kamapim long long 20 Januери
 Ol wokman na lainim ol pipel dispela yia.



Ol katun piksa bilong Intanesenel Red Cross komik book.



Sensasip kisim bikpela helpim long Gavman

Minista bilong Yut, Sios na Komyuniti Developmen i tok olsem toktok bilong Oposisen Lida Don Polye sampela taim i go pinis olsem Gavman i katim bikpela mani bilong Sensasip opis long las yia em i no tru.

Minista Delilah Gore i tok olsem O'Neill/Dion gavman i bin wokim planti samting long helpim Opis bilong Sensasip aninit long Dipatmen bilong Yut, Sios na Komyuniti Developmen long wei bilong moa fanding na long givim trenim long moa manmeri bilong wok.

"Mi no save Oposisen Lida i kisim toktok bilong em long we? Em ol tokwin nating na mipela i no inap long larim i go nating," Minista Gore i tok.

Tok bilong Mista Polye olsem ol i no mekim gut wok bilong kli-aim ol piksa nogut i kam insait long kantri em i bikpela tok bilas long gavman na Opis bilong Sensasip bikos tupela opis wantaim i mekim bikpela wok long kamapim wanpela sistem bilong sekim ol samting i kam insait



Misis Delilah Gore – Minista bilong Yut, Sios na Komyuniti Developmen. Poto: Wantok faile poto.

long ol inanet.

Misis Gore i tok tu olsem gavman i givim moa mani gen long Opis bilong Sensasip inap long mak bilong 3 milien kina long las yia na ol bai lukluk long kisim moa mani antap long dispela mani mak long dispela yia gen.

"Gavman i givim pawa long Opis bilong Sensasip long lukautim ol mani bilong em yet long las yia wantaim baset bilong ol yet na i no moa wantaim dipatmen," Misis Gore i tok.

Mista Polye i bin tok olsem Sensasip Opis i no gat inap wokman na mani, tasol Misis Gore i tok gavman i tok orait pinis long wanpela nupela straksa bilong Opis long las mun na namba bilong ol wokman na wokmeri nau bai go antap long 63 olgeta.

Em i tok narapela bikpela hap bilong gavman i helpim opis em long dispela yia, ol pawa bilong Sif Sensa bai go long provinsal na lokal level gavman long kantri.

Dispela em i wanpela eria wei Opis bilong Sensasip i putim namba wan long Enuel Operesen Plen bilong dispela yia.

"Dispela Opis i gat bikpela wok long banisim na lukautim sosaiti bilong yumi na ol pasin bilong ol pipel. Olsem na pasin bilong resis long nem na namba bilong politik long kisim skoa em i no gutpela. Yumi mas wok olsem patna long rausim ol kain pasin nogut we inap long bagarapim ol famili, komyunit na sosaiti bilong yumi," Misis Gore i tok.

Nutrisen awenes, na lainim kuk na kaikai gut

Helen Tuka, Wol Visen PNG Komyunikesen

WANPELA kaikai nutrisen awenes wantaim wanpela skul bilong kukim gutpela kaika i kamap olsem gutpela taim bilong lainim planti famili long ol i mas kaikai ol kaikai we i gat tripela kain kaikai insait olgeta de.

Helt na Nutrisen Projek tim bilong Wol Visen PNG i bin go long ples Bari na Botola long Bogia Distrik Ina Usino Bundi distrik long Madang Provins i no longtaim i go pinis long mekim dispela awenes trening.

"Em i gutpela long save long wanem kain samting i stap insait long ol kaikai yumi save kaikai we i save helpim bodi bilong yumi long mekim wok. Dispela save em i lusim mipela

pinis taimmipela i lusim skul longtaim bipo pinis," Joe Seggi, wanpela komyuniti lida bilong ples Bari i tok.

Mista Seggi i tok bikpela san bilong El Nino i bagarapim planti gaden kaikai bilong ol n em i impoten long tok-save long ol komyuniti long ol i mas planti ol kainkain gaden kaikai bilong ol gen long ol famili bai i gat inap kaikai olgeta de.

"Nau liklik ren i kam na mipela i laik planim planti kaikai olsem ol kumu klostu long ples bilong helpim mipela. Mipela planim ol kumu olsem ol bin, tamato, papaya na planti moa," em i tok.

PNG Helt na Nutrisen tim i toktok long kainkain stail bilong kaikai long ol grup bilong ol na wanem samting i stap insait long ol

dispela kaikai long helpim wok bilong bodi. Ol memba long tim i lukim olsem sampela ol papa wantaim ol pikinini i amamas long wok wantaim ol.

Bieta bilong Botola Viles i tok: "Mi laikim planti kala long plet kaikai bilong mi planti taim olsem na mi traim long planti planti kain prut diwai olsem papaya.

Bipo mipela i no save planti ol prut diwai. Mipela i save planti ol bikpela kaikai tasol olsem saksak, tapiok, taro, yam na ol bikpela kumu samting. Em i gutpela long ol mama bel sapos mipela i planti planti prut diwai klostu long ples."

"Mi save laik mao banana na painapel, em ol fevoret prut bilong mi," yanpela Philp Amuf bilong Botola viles i tok.

Helt bilong ol pipel em i wanpela namba wan samting long PNG na Wol Visen PNG i gat strongpela tingting long wok wantaim ol patna bilong em olsem gavman long kamapim gutpela helt na nutrisen bilong ol mama, pikinini na ol bebi long bel na ol bebi inap long 23 mun.

PNG Helt na Nutrisen projek we Wol Visen PNG ranim i stap long ol komyuniti long Madang, Morobe, Pot Mosbi na Atonomas Rijn bilong Bogenvil wantaim fanding i kam long Australia Dipatmen bilong Foren Afes na Treid na Wol Visen Australia.

PNG pulap long klin eneji risos

INSAIT long Pasifik rijon, PNG tasol i gat planti ol samting samting bilong kamapim sastenebel eneji.

Sastenebel eneji i save kam lonh haidro pawa, sola pawa, win pawa, baiomas, jiotemal pawa na naklia pawa.

Ol dispela samting em ol klin eneji risos na ol i save kamapim sastenebel pawa o klin eneji we i no gat wanpela gris haus ges bai kamaut.

Dispela ol samting bilong kamapim sastenebel pawa i mas kamapim pawa saplai long ol Pasifik ailan kantri bikos dispela em i wanpela rot bilong daunim klaimet senis birua.

Eketiv Dairekta bilong Pasifik Pawa Asosiesen, Andrew Daka, i mekim dispela singaut long Suva, Fiji.

Mista Daka i tok PNG em i wanpela kantri insait long Pasifik we em i gat olgeta samting long kamapim klin eneji na gavman i mas yusim gut ol dispela samting long kirapim ol gutpela samting long kamapim nuplea sos bilong kamapim klin eneji.

"PNG em i wanpela kantri we em i gat gutpela wara i ran long maunten long kirapim haidro pawa saplai.

"Gutpela san i save kamap long PNG tu long kirapim sola pawa projek.

"Long sampela ples olsem

long maus bilong Flai Riva na long Milen Be provins, i gat gutpela hap we wara em i strong tumas long kamapim taidel eneji.

"Strongpela win tu i save kam long sampela ples arere long solwara," Mista Daka i tok.

Em i tok ol Pasifik ailan kantri i les long yusim ol disel jenereta bikos smuk bilong ol disel jenereta i save kamapim grin haus ges.

Ol grin haus ges i save kamapim ples i kamap hot moa na dispela hot i save larim ol ais i kamap wara.


Dispela wara i wok long kirapim level bilong solwara na i wok long daunim ol liklik

ailan kantri insait long Pasifik na arapela hap long wol.

Mista Daka i tok PNG i save yusim diesel jenereta long kisim pawa saplai.

"Maski PNG i gat olgeta samting long kirapim klin eneji tasol PNG i save yusim ol disel jenereta long kisim pawa saplai," Mista Daka i tok.

Em i singautim gavman long inves long ol sastenebel eneji projek bikos PNG em i bikpela kantri long Pasifik ailan na dispela bai soim ol arapela liklik kantri long rijon olsem PNG em i trutru mekim sampela samting long pait egensim birua bilong klaimet senis.



Ges i paia i PNG LNG Plant sait ausait long Pot Mosbi. Ges em i wanpela eneji risos.

Strongim bilip na senis

STRONGIM felosip na wokabaut wantaim Krai i wanpela samting i mas kamap insait long Yunaitet Sios long PNG.

Long wankain taim tu, sampela senis i mas kamap long sios straksa.

Pastaim hetman bilong Yunaitet Sios long PNG, Reveren Samson Lowa i bin wokim ol dispela tok-tok long Sione Kami Memoriel sios taim Yunaitet Sios i bin selebretim 48 krismas bilong em olsem sios i kamap wanpela.

Pastaim i bin gat tripela sios. Em long London Metodis Misin Sosaiti i (LMM), Papua Ekalesia na Yunaiting Sios (UC) tasol long yia 1966, ol tripela sios i bin bung wantaim na kamapim Yunaitet Sios (UC) long PNG na Solomon Ailan. Tasol Solomon Ailan tu i bin lusim PNG na PNG i kamap wanpela sios em yet.

Long taim ol i holim se-



Reveren Lowa

lebresen, Reveren Lowa i bin toktok strong long felosip na wanem wan wan man na famili na komyuniti i ken mekim long skruim wok na kingdom bilong God.

Reveren Lowa i bin tok felosip na wokabaut wantaim Jisas i bikpela samting, winim ol taitel we man i gat long en.

“Wokabaut wantaim Krai, singsing moa long Jisas, Yunaitet Sios i nidim Jisas moa winim taitel.” Reveren Lowa i bin tok.

Em i tok yumi no ken yusim ol posisen long yumi yet, tasol long givim glori i go long Bikpela.

Em i tok Yunaitet Sios i kamap long mak bilong 48 krismas, tasol level bilong felosip i wok long go daun.

“Yupela i ken lukim olsem level bilong felosip i wok long go daun, olsem mi harim long Asembli Sekleteri. Ating Yunaitet Sios i no wok long bihainim pasin bilong Krai.

“Ol man i save kam na tok long yu, hei brata om susa, toktok bilong yu i

narakain, mi laik save moa long yu, watpo yu narakain.

“Yunaitet Sios, yumi ken kisim dispela na putim long laip bilong yumi. Mi pre olsem ol narapela pipel bai kam long yu na tok yu narakain na tokim mi wanem sikret bilong yu.

“Yumi gat 11 rijon. Mi save olsem taim mi go aut, mi bin tok yumi no ken bildim empaia bilong yumi, tasol yumi bildim Kingdom bilong Bikpela.

“Na mi bilip olsem long taim sios i laik kamap 50 yia, bai yumi lukim planti salens.

“Ating nau yumi no ken toktok, tasol stop long toktok long ol sios na glasim yumi yet na tok, yumi ken wokim wanem samting, senisim laipstail bilong yumi, prea laip na soim testimoni olsem lait na ol arapela i ken bihainim,” Reveren Lowa i bin tok.

Larim ol kaunsil yet i votim presiden

WANPELA kaunsila long Enga Provins i singuatim Inta Gavman Rilesens Minista Leo Dion long senisim lo bilong ileksen bilong kaunsil presiden.

Kaunsila Nanga Yapao bilong Lauanda kaunsil wod insait long Wapenamanda distrik, Enga Provins i les long ol pipel i votim ol kaunsil preiden long 2018 lokal gavman (LLG) ileksen.

Mista Yapao i stap long Wapenamanda na tokim Wantok Niuspepa olsem planti pasin korapsen na paul pasin i bin kamap long yia 2012 taim ol pipel i bin votim ol presiden.

Em i singaut long gavman long senisim dispela lo na larim ol wan wan lokal kaunsil i makim presiden bikos em i les long lukim wankain samting i kamap long 2017 Nesanel Ilek-sen.

“Planti pasin korapsen i bin

kamap long ples bilong mi. Ol pipel i no bin votim gut ol kaunsil presiden.

“Planti LLG preiden ileksen long Hailans rijon i no bin kamap gut.


Ol vota na kendidet i no bin bihainim lo stret tasol ol i bin mekim paul pasin, stilim ol ballot pepa na bokis, vot tupela o tripela taim, na pait na trabel tu i bin kamap,” Mista Yapao i tok.

Em i singaut long Deputi Praim Minista Leo Dion na Ilek-toral Komisin long lukluk long dispela samting na larim ol kaunsil yet i makim presiden.

“Ilek-toral Komisin i bin tok planti kaunsil presiden ileksen i bin kamap feil ileksen.

Mi les long Ilek-toral Komisin i westim mani long ranim gen saplimentri o bai ileksen bilong LLG presiden,” Mista Yapao i tok.

TOKSAVE!! TOKSAVE!! TOKSAVE!!



Wantok
Niuspepa

Stat long Mande 01 Februeri long neks wik, Wantok Niuspepa opis bai i go long narapela hap long Boroko.

Opis nau bai lusim Able Computing haus long Sentral Waigani, tude Fonde 28 Janueri na i go long DOVE TRAVEL SEVIS HAUS LONG SEKSEN 24, LOT 25, ANGAU DRAIV (KONA BILONG LAHARA AVENUE), BOROKO.

Opis fon namba (325 2500) na fex namba (325 2579) bai stap wankain yet tasol ol email adres bilong olgeta wokman na meri bai senis.

Pastaim email adres i pinis wantaim dispela mak, @wantok.com.pg, tasol nau em bai pinis wantaim @wantokniuspepa.com.

Ol mobail namba long ringim mipela long bisnis insait long taim bilong muv em:
73329467 – Elizabeth Konga – Jeneral Menesa
76210007 – Lesley Bentz – Edvetaising na Sels Menesa
72739408 – Veronica Hatutasi – Edita
73650795 - Edvetaising

Long bisnis toktok, sapos yu save long mobail namba bilong wanpela wokman o wokmeri orait ring long mobail tasol na toktok.

Wantok Niuspepa i laik toksave tu olsem mipela salim olgeta opis tebol na des long K200 wanwan. Yu kam hariap bai yu baim wanpela long liklik prais tasol!

Toksave i kam long Jeneral Menesa, Elizabeth Konga.

Seken sans long edukesen



John Newman Lem bilong Madang i kisim seken sans long Sentral Provins.

Bikpela paul i stap long edukesen

Frieda Sila Kana i raitim

BIKPELA tingting paul i stap long planti hap bilong edukesen bilong ol liklik sumatin na ol bikpela teseri institusen long dispela yia, tasol olgeta hap ol papa mama na ol sumatin i go ol i no painim wanpela gutpela ansa.

Long las yia, olgeta praimer skul na sekenderi skul i kisim fri edukesen we ol i no bin baim wanpela projek fi olgeta. Ating long ol praivet na ejensi skul ol i sasim sampela projek fi tasol olgeta pablik skul em ol i no bin baim projek fi.

Tasol nau ol pikinini i go long skul bilong putim nem olsem Kila Kila Sekenderi

skul long Nesenel Kepital Distrik, em ol tisa i tok long pikinini i gat projek fi slip o risit bai kisim spes long klas long wankain taim yet. Na ol pikinini husat i no gat disposit bilong projek fi em ol i tokim ol long baim projek fi pastaim na bihain go bek gen long rejista.

Long sampela gutpela astingting long Mande 1 Febuari sampela pikinini i no gat nem yet long ol gret 9 bai go insait long wanem klasrum. Ol i salim ol i go bek gen na tokim ol long go bek long asde we bai ol i kisim klasrum.

Insait long las wik na dispela wik, toktok i kam long edukesen minista na edukesen seketeri em olsem ol

papamama bai no inap baim projek fi. Tasol sampela wik i go pinis ol wankain man tasol i bin tok long ol skul i ken sasim projek fi.

Asde long Kila Kila sekenderi skul ol gret 9 sumatin i go long skul tasol klasrum i no redi yet. Na tu tripela klas tisa bilong ol gret 9 i no kamap long skul yet. Prinsipel, Mista Panai i tokim ol sumatin long go bek gen tude long skul na bai ol i kisim buk bilong ol taim ol i soim risit long kentin bilong skul.

Mista Panai i tok tu olsem toktok bilong projek fi i no klia yet na em i tok long ol sumatin bai holim pastaim. Tasol watpo na em i tok

long soim skul fi risit na kisim buk? Ol pikinini i paul. Ating edukesen Minista na Seketeri i mas mekim klianau dispela samting.

Olgeta samting i kostim mani. Moa long ol taun na siti olsem Nesenel Kepital Distrik we ol sosel sevis olsem wara na pawa na sekyuriti bilong skul em i namba wan. Ol i mas gat mani long ranim ol dispela sevis pastaim long ol i ken kisim skul subsidi bilong ol.

Ating em i moa beta edukesen dipatmen na minista bilong edukesen i mas kamap wantaim wanpela tingting tasol na tok save gut na bai larim ol papamama na ol sumatain i ken go het long lukluk long ol narapela nid.

Skul i stat wantaim pait

Frieda Sila Kana i raitim

OL sumatin bilong Kila Kila Sekenderi Skul long Nesenel Kepital Distrik i kirap nogut long taim bilong statim skul asde taim ol ausait mangi long Kaugere na Sabama i ran go insait long banis bilong skul long bringim pait long ol skul sumatin.

Pasin bilong pait wantaim ol sumatin na holim ol wantaim naip em i wanpela kain kalsa bilong dispela skul we ol setelmen i raunim olgeta hap bilong en.

Ol gret 9 pikinini i nupela long dispela skul em ol i pret na guria long lukim ol ausait lain i kam insait long banis nating na i no gat sekyuriti long stopim ol.

Ol sumatin i no save ol dispela ausait mangi painim husat sumatin tru. Tasol dispela kain pasin em ol atoriti bilong skul bai mas painim rot bilong putim ol sekyuriti husat i gat namba na nem long siti. Bilong wanem dispela eria em i gat nem long ol kain pasin nogut bilong ol trabel lain i save kamap olgeta yia.

I gat sampela tokwin tu namel long ol sumatin olsem ol gret 10 i gat tingting long paitim ol gret 9 olsem em i kalsa bilong skul. Ol sumatin i gat bikpela tingting long skul na ol i go long sekenderi skul tasol dis-



Ol gret 10 na 12 sumatin bilong 2015 sindaun harim toktok long taim bilong greduesen. Olgeta i sindaun wantaim wan wan papa o mama. Foto: Frieda Sila Kana.

pela kain ol rabis tingting na pasin bai raunim ol o bai mekim tingting bilong ol i bagarap na tu sampela taim ol inap kisim bagarap long bodi tu sapos ol tok win i karim kaikai.

Long las yia Kila Kila Sekenderi skul i bin namba wan skul insait long Nesenel Kepital Distrik long kisim ol iPad kompiuta o fon i kam long Gavana Powes Parkop. Long wankain wik yet ol i bin givim aut long ol gret 12 na bihain ol gret 11.

Tasol ol gret 9 na 10 i no kisim yet na klostu long yia i pinis, planti iPad bilong ol gret 9 na 10 sumatin em ol

stilmann i brukim klasrum na stilim olgeta. Dispela ol iPad em Gavana bilong NCD i bin givim bilong ol sumatin i lainim gut long taim ol i yusim intanet. Tasol em i go long han bilong rong lain.

Ol dispela kain stori i bin mekim tingting bilong ol gret 8 sumatin bilong ol skul klostu long Kila Kila Sekenderi olsem Bavaroko na Taurama i no bin kirap long go insait long dispela sekenderi skul long wokim gret 9.

Ol i bin rait long edukesen dipatmen long salim ol i go long ol narapela skul long NCD olsem Gordon Sek-

enderi, Jubilee na Marianville. Tasol pas bilong edukesen dipatmen i kam long ol sumatin husat i winim spes long haikul i tok olsem olgeta bai i go long Kila Kila Sekenderi Skul. Wantaim dispela kain wari long tingting bilong ol, em i no gutpela long skul bikos em bai ken daunim laik bilong ol o strong bilong ol long skul gut.

Ating dispela kain pasin i strongim moa tingting bilong ol skul i mas gat moa mani long baim gutpela sekyuriti long lukautim laip na ol samting long ol kain eria olsem Kaugere na Sabama long NCD.

Frieda Sila Kana i raitim

LEM, John Newman wanpela pikinini Madang i no bin pinisim gut skul bilong em long ples nae m i go long Pot Mosbi.

Em i laik painim rot long go insait long wanpela skul long Nesenel Kepital Distrik we ol papamama bilong em i save stap.

John em i bin save stap wantaim ol bubu bilong em long Karkar Ailan long taim em i liklik yet. Em i wanpela strongpela het pikinini husat i gat bikpela laik nau long skul na kamap nevi ensinia long PNG Difens Fos.

Taim John em i liklik em i no save stap isi long skul nae m i bin go i kam long elementri skul planti taim. Tasol taim em i bikpela em i lukim olsem skul em i namba wan rot long em bai inapim driman bilong em long kamap ensinia long wanpela sip na tu long kamap wanpela ami nevi.

Em i lusim Madang long 2012 na i kam long Pot Mosbi tasol em i no bin inap long painim wanpela skul i redi long kisim em i go insait. Gutpela God i kamapim rot bilong em long las yia 2015 taim wanpela Kristen brata bilong

em i go tis long Hula long Rigo Distrik bilong Sentral Provins. Em i go insait long wokim gret 7 na taim skul yia i pinis em i bin mekim gut tru. Em i kisim tupela akademik prais long Matematik na Saiens.

John i laik givim tenkyu long God Papa husat i bin helpim em long dispela rot bikos taim em i go insait long dispela skul em i go lotu long wanela Foa Skwea sios i stap klostu long ples. Em i sisim laip bilong em olgeta taim em i go insait long pilai musik na kamap musik lida long dispela lokal sios. Long wankain taim tu ol lida bilong sios long Rigo i makim em olsem wanpela eksekutiv bilong Rigo Foa Skwea Yut.

Holim skul long wanpela han na holim wok bilong God long wanpela han em John Lem i wokim gut long skul bilong em. Sampela taim em i gat sampela hevi tasol dispela i no save daunim em na em i go het yet.

Dispela yia em bai wokim gret 8 na husat save ating em bai go insait tu long nupela Hood Poin De Hai Skul wantaim namba tu gret 9 intek bilong ol long yia 2017.

Australia-China-PNG Trilateral Malaria Projek

OL gavman bilong Australia, Saina na Papua Niugini i bin wokim wanpela wokbung bilong daunim sik malaria long Papua Niugini, long Tunde 26 Janueri, 2016 long Pot Mosbi.

'Australia-Saina-Papua Niugini Pailot Kopresen long Malaria Kontrol' em namba wan kain patnasip program insait long Esia Pasifik rijon na em i kam bikos Nesanel Dipatmen bilong Helt long PNG i bin askim long en.

Wantaim dispela projek, ol tripela kantri bai lukluk long wok wantaim Nesanel Dipatmen bilong Helt, Senral Pablik Helt Laboretori na Institut Medikal Risets long kamapim gutpela wei bilong painimaut ol binatang bilong malaria i save wok olsem wanem insait long PNG wantaim

helpim i go long laboretori sevis na risets.

Insait long narapela tripela yia bihain 2016-2018, Australia eid program bai givim PGK 8 milien mani long projek na Saina Nesanel Helt Famili Plening Komisen bai givim teknikal ekspetis o saveman na tu sampela samting bilong wok bilong helt.

Dispela projek em i sanap Poroman wantaim Australia eid program long lukluk long strongim PNG helt sistem wantaim moa masin na samting bilong wok i go long ol PNG medikol institusen long mekim wok gut long painim aut wok bilong ol binatang na long givim ol marasin bilong malaria.

Saina i mekim bikipela senis pinis long wei bilong stopim sik malaria na kontrolim wok bilong

en inap 60 yia nau olsem na ol i gat moa save long dispela wok.

Saina i redi long serim save bilong ol wantaim Papua Niugini long stopim dispela sik.

Papua Niugini i save gat 89 pesen bilong olgeta malaria sik long Pasifik rijon na malaria i stap long olgeta provins, olsem na dispela i kamapim bikipela birua long helt na givim moa hevi long ikonomi bilong PNG. Namel mak em olsem 1.5 i go long 1.8 milien taim ol pipel i save kisim sik malaria na ol i save go long ol haus sik o klinik long olgeta hap bilong kantri.

Tripela kantri patnasip em i sapotim stret prairiti bilong Gavman bilong PNG long Nesanel Malaria Stratejik Plen 2014-2018.



L-R Australia Hai Komisina long PNG, Bruce Davis, Minista bilong Helt Michael Malabag na Embeseda bilong Saina long PNG, Li Ruiyou.

Helt Seketeri toksave long sik Zika Vaires

SEKETERI bilong Nesanel Dipatmen bilong Helt, Pascoe Kase i tokaut long midia dispela wik long sampela tingting bilong wanem kain wok gavman i mekim nau long redi long nupela sik we natnat o Moskito i save karim i go i kam.

Dispela sik Zika em i bagarapim planti lain long Saut Amerika na long sampela hap bilong Pasifik. Mista Kase i laik tokaut long ol pipel olsem Nesanel Dipatmen bilong Helt i wok long redi long pait wantaim dispela sik sapos em i kamap long kantri.

Em i tok, dispela sik Zika varies em i save raun wantaim wankain natnat o Moskito we i save karim dengi, yelo fiva, chikungunya na ol narapela sik we Moskito i save karim raun. Em i tokaut olsem

wanem samting ol midia i wok long toktok olsem planti pipel bai i no inap soim sain bilong dispela sik o bai kisim liklik skin hat o dengi kain sik, skin i ret, na masol na join i pen na retpela ai, skin les na hetpen. Ol sain namel bilong sik i save stap olsem 4-pela i go 7-pela dei na ol i ken kisim pen marasin na skin hat marasin, slip malolo na dring planti wara. Nau yet i no gat banis marasin long stopi Zika varies.

Mista Kase i tok moa olsem bikipela wari bilong Zika nau i stap em long ol nupela lain i kisim sik long Saut Amerika long kantri Brasil em ol bebi we mama i karim ol i gat liklik het na sampela rop bilong bodi i no wok gut.

Tasol Mista Kase i tok, ol i lukim olsem Zika vares i stap long ol

mama na bebi bilong ol tasol ol i no save gut yet sapos dispela sik i kamapim dispela kain bodi bagarap long ol bebi. Dispela i mekim Wol Helt Ogenaisesen long tokaut long Febueri 1, 2016 olsem Zika varies i kamap bikipela hevi bilong Pablik Helt Imejensi.

Seketeri Kase i tok olsem Nesanel Dipatmen bilong Helt wantaim teknikal sapot bilong Wol Helt Ogenaisesen i wok long mekim wok hariap long redi long menesim dispela sik sapos em i kamap long kantri. Em i tok save olsem dipatmen i wok long hariap long kisim was long ol sik we Zika varies inap long kamapim na tu long luksave long sampela kain senis long bodi bilong ol bebi long taim bilong mama i karim.

Em i tok dipatmen i wok long

givismaut ol toksave i go long ol heltke menesa na ol lain i save givim ol helt sevis long kantri. Em i toksave long ol pablik i mas go long ol haus sik sapos ol i ting olsem ol kisim dispela Zika varies. Em i tok, kantri i gat wei bilong sekim Zika varies hariap tasol. Sapos yumi save hariap long binatang o varies em bai yumi ken givim helpim hariap.

What should pregnant women (or women of childbearing age who might become pregnant) do to protect themselves and their unborn babies?

Mista Kase i tok olsem ol saveman i no painimaut kliia tru sapos i gat sampela hevi i stap namel mama bel na bebi ol i karim wantaim liklik het. Tasol bilong pasim rot bilong kain sik, ol pipel na ol

bel mama i mas no ken larim Moskito i kaikaim ol na ol i mas putim ol klos i no gat blek kala tumas. Na ol i mas karamapim ol bodi bilong ol na putim ol marasin bilong rausim Moskito.

Ol i mas stap insait long haus i gat flai waia, pasim dua na ol windua; na slip insait long ol Moskito net long san taim dispela Moskito i save raun.

OL meri husat i gat bel na ol i laik go long wanpela bilong ol ples we i gat dispela sik em ol i mas lukim dokta bilong ol pastaim long ol i lusim kantri. Sapos wanpela bel mama i pilim olsem emi bin go long hap i gat Zika varies em i mas go lukim ol dokta na nes hariap long helpim em o long lukautim bebi long bel.

Helt toktok i kam long Pot Mosbi Jeneral Haus sik

Dispela wik toktok bilong PMGH em bai lukluk long Meningitis. Na Meinigitis em i wanem kain sik? Wanem samting i save kamapim dispela sik na wanem kain sain bai soim yumi olsem dispela sik i kamap?

Meningitis em i wanem kain sik?

Meningitis i save kamap taim ol karamap bilong kru bilong het na rop long bun baksait i solap. Meningitis em wanpela sik we em inap long bagarapim laip bikos solap i save kamap klostu tumas long rop bilong bun baksait na

long kru bilong het. Dispela i mekim sik meningitis wanpela medikal imejensi.

Sik meningitis i save kamap long ol binatang i save kalap o raun long win o long binatang long bodi. Bikipela sain bilong dispela sik em i save kamapim hetpen, nek i tait, strongpela skin hat, tingting i paul, na het i pilim olsem i no gat hevi na pilim traun.

Planti tai moa dispela sik i save kamap long ol binatang i save raun long win na bihain em ol sik i kamap long ol binatang long bodi ol baktiria..

Baktiria Meningitis – Baktiria meningitis em i strongpela kain na em i save go bikipela hariap sapos sikman o meri i no kisim marasin hariap nae m inap long kamapim dai o mekim sikman i kamap disebel o sampela bodi i no wok gut.

Planti moa baktiria o meningitis i save kamap long binatang 'meningococcus, pneumococcus, na Haemophilus influenzae Kain B baktiria. Ol narapela baktiria inap long kamapim meningitis em E-coli, Grup B strep na Mycobacteria tuberkulosis [TB]. Sik binatang

i save kalap long wanpela man o meri i go long narapela taim ol i pulim win na hap maus wara i go wantaim o taim ol i kis wantaim, kaikai wantaim o yusim wankain plet, kap na spun.

I gat vaksin o banis marasin i stap long pasim rot bilong kainkain baktiria bilong meningitis we ol dokta inap toksave long yu.

Virel Meningitis - Virel meningitis em i save kamap planti tasol i no save kamapim bikipela bagarap tumas. Olgeta lain husat i kisim dispela sik i save kamap

orait gen na i no gat bikipela bagarap i save kamap long ol. Ol i save stap sik na kisim marasin longpela taim liklik.

Virel meningitis inap long kalap long taim sikman o meri i tromoi spet, kus, o pekpek na narapela i kisim. Ol lapun man na meri husat i no gat bikipela strong long bodi em isi tru long kisim dispela kain sik. Dispela sik i no gat vaksin o banis marasin long stopim ol binatang bilong en.

Bai yumi harim moa long neks wik.

Nupela bos bilong DWU em i meri

NAU, PNG i lukim moa meri i kisim wok we ol man tasol i save mekim bipo.

Hatwok na strongpela tingting, maski ol kain hevi i stap, i mekim ol i kisim wok long menesmen, edministresen na eksekativ posisen.

Dokta Cecilia Nembou i wanpela long ol dispela kain meri.

Dokta Nembou nau i kamap nupela Presiden o bos bilong Divain Wod Yunivesiti (DWU) long Madang. Em i kisim ples bilong Fr Jan Czuba.

Dokta Nembou bai lukatim DWU, DWU Kempas long Pot Mosbi na ol arapela Katolik Institusen i hap han bilong DWU olsem Kabaleo Tisa Kolis long Is Nu Briten, Vunapope Nesing Kolis long Is Nu Briten na St Benedict Tisa Koles long Wewak.

Em i namba wan meri long dispela kantri long kamap bosmeri bi-

long wanpela yunivesiti long dispela kantri.

Dokta Nembou i stap long menesmen level insait long haia edukesen sekta long 20 krismas nau na eksperiens na save wantaim strongpela tingtring bilong em i kisim em i go antap moa na nau em i kamap bosmeri long wanpela bikpela yunivesiti long dispela kantri.

Bipo long holim dispela nupela wok, Dokta Nembou i bin wok olsem Deputi Vais sansela bilong DWU long 2005 na long 2006, em i bin kamap Vais Presiden bilong Pot Mosbi DWU kempas.

Pastaim long dispela, Dokta Nembou i bin wok long Yunivesiti bilong PNG inap long yia 2003 we em i bin holim posisen olsem Ekt-ing Vais sansela na bihain, Pro Vais Sansela long 1999.

Sampela bikpela hevi i bin

kamap long UPNG long dispela taim na Dokta Nembou i bin lusim UPNG, na em i bin kisim wok long wanpela yunivesiti long kantri Dubai, long Yunaitet Arab Emirets (UAE) inap tupela yia.

Dokta Nembou i tok em i tru olsem i gat "gender discrimination" o pasin ol man tasol i holim ol bikpela wok, na no gat long ol meri. Na taim ol meri i go insait long ol bikpela wok, no gat sapot, luksave o rispek tumas long ol.

Tasol em i tok hatwok, strongpela tingting, bilip long yu yet i ken mekim wok na no gat sotkat em ol rot i ken helpim ol meri long go fowet.

Dokta Nembou i wanpela gutpela piksa o rol model bilong ol PNG meri na i moabeta ol yangpela meri i ken lukim na bihainim long kamap ol gutpela lida insait long kantri.



DOKTA CECILIA NEMBOU: Nupela bosmeri bilong DWU. *Poto: Wantok Fail piksa*

Kuk na beik trening i helpim gut wanpela mama

TRENING long kuk na beik i helpim gut wanpela mama na famili bilong em long Pot Mosbi siti.

Jessie Faio bilong Galp Provins i wanpela meri sios lida na memba bilong Seven De Adventis Sios.

Man bilong em i Wod Kaunsila long Meii Komyuniti long Galp Provins.

Misis Faio na tupela poroman long em long sios i bin sindaun long Kuk na Beik trening skul taim man bilong em i sindaun loing Besik Buk Kiping kos em Meii Salvesen Ami Lig i bin ranim wantaim helpim bilong Strongim Pipel Strongim Nesen (SPSN) Program.

Misis Faio i tok pastaim long em i go long dispela trening skul, em i no bin save long bek gut, na em i save wokim ol skon inap tasol long famili, na liklik bilong salim.

"Dispela trening i helpim mi gut tru na nau, mi wok long beikim planti long salim na sampela bilong famili i ken kaikai," Misis Faio i tok.

Em i tok ol pikinini na ol



Jessie Faio i amamas long kuk na trening long beikim ol kaikai. *Poto: SPSN Niusleta*

kastoma i save tok "rait skon" long ol skon bilong em.

Em i save beikim bret, ol skon na kek.

Em i tok man bilong em i sapatim em gut long kuk na beik projek bilong em.

Em i tok man bilong em i save baim 50 kg flawa long K125.00 na taim em mi beik na salim, em i save kisim K300 long en. Mak bilong profit o winmani em hap o K125.

- Stori i kam long SPSN Niusleta

Tupela meri winim skolasip long skul long Australia

PLANTI yangpela meri nau long PNG i strongim tingting long skruim skul na ol i ken helpim long ol wok developmen bilong kantri.

Kisim piksa bilong tupela meri i wok wantaim Strongim Pipel Strongim Nesen (SPSN) program, we i stap aninit AusAID husat i lusim PNG long las mun i go long skul long Australia.

Tupela meri ya em Navawa Kiens na Jesslyn Paul.

Ol i go skul long ol wan wan yunivesiti long Brisben, na Nu Saut Wels long Australia bihain ol i bin winim Australia Awad skolasip.

Navara bai wokim Mas-tas Digri long Yunivesiti bilong Kwinslen long Brisben we bai i skul long Masters in Development Practice.

"Strongim Pipol Strongim Nesen (SPSN) Program i helpim mi long



Benson, Jesslyn na Navara i skul nau long Australia bihain long ol i lusim PNG long Janueri long go long Australia. *Poto na stori: SPSN Niusleta*

rot mi kisim long stadi na wok mi laik bihainim, na givim mi stia long ol eria olsem gavanens, edukesen, helt na jenda," Navara i tok.

Em i tok long sait bilong gavanens, em i developim intres taim em i wok wantaim SPSN long rot we em i ken bringim developmen na rot yumi mekim em i

bikpela samting olsem tasol ol wok yumi mekim.

Wankain stori bilong Jesslyn i stadi nau long Yunivesiti bilong Wollongong long Nu Saut Wels. Em i tok SPSN i wanpela gutpela program we i helpim em gut long bihain taim bilong em.

Wanpela man tasol i kisim sponsasip wantaim

tupela meri em Benson Hwahambu i tok wok wantaim SPSN i helpim em gut long kodinetim ol fanding na projek menesmen.

Em bai skul long Murdoch Yunivesiti long Perth, Westen Australia long skruim moa save bilong em long menesmen na gavanens eria.

Raun lukim ol mama na pikinini...



Poto 01: SIOS BUNG: Ol mama bilong Poreporena Yunaitet Sios i redi long wanpela sios bung bilong ol. *Poto: Wantok Fail.*



Poto 02: REDIM KAIKAI: Bihain long sios bung, ol Yunaitet Sios mama grup long Poreporena Seket i redim ol kaikai i stap. Tupela mama i amamas long Wantok i kisim piksa bilong ol. *Poto: Wantok Fail*



Bilong wanem singaut strong?

Wanpela de, Mother Teresa bilong Kalkuta wasim sampela pikinini i no gat papamama bilong ol arere long bikpela wara ol i kolim Wara Gangga long India. Em i lukim wanpela man na meri (tupela marit) i kros na bikmaus long narapela narapela. Ol i singaut strong na bikpela tru.

Mother Teresa i tanim na askim sumatin bilong em: "Bilong wanem taim manmeri i kros ol i save bikmaus na singaut strong?"

Wanpela sumatin i bekim; "Sapos yumi belhat tru na no gat patiens moa, yumi save bikmaus, na singaut strong."

Mother Teresa i tokim em "Bilong wanem yu mas singaut strong? Man i no stap longwe. Em i stap klostu long yu ya? Yu inap long salim tok save bilong yu i go long en isi isi tasol. Em bai harim tok save bilong yu ya!"

Na sumatin bilong em i diskas namel long ol yet. Tasol bekim bilong ol i no inap karim wanpela gutpela kaikai.

Bihain, Mother Teresa i tok: "Taim tupela i kros, bel bilong ol i stap longwe tru long narapela narapela. Olsem na ol i mas singaut strong bai ol pren bilong ol inap long harim. Taim kros bilong ol i kamap bikpela, ol bai singaut strong moa-moa yet, bikos disten bilong tupala bel i kamap longwe moa moa yet."

Na em i tok moa: "Wanem samting i kamap sapos tupela i laikim narapela narapela? Taim ol i toktok, ol i no singaut strong o bikmaus long narapela narapela. Ol bai toktok isi tasol. Bikos tupela bel bilong ol i stap klostu tru. No gat wanpela samting i separetim bel bilong tupela na tupela bel bilong ol i stap klostu tru."

Em i sarap liklik na reflektim wanem samting em i autim pinis na i tok moa: "Sapos laikim bilong ol i kamap strong moa moa yet, wanem samting bai kamap? Tupela bai i no toktok moa. Tupela bai tok isi isi (whisper) tasol na holimpas strong tru. Na bihain, ol i no inap whisper moa. Tupela bai lukluk tasol long narapela narapela. Bel bilong tupela i gat strongpela laikim pasin i bosim ol, tupela bai i stap klostu tru."

Lukluk strong long sumatin bilong em, Mother Teresa i tokim ol: "Sapos yupela i kros, no ken larim bel bilong yu i stap longpela long narapela narapela. No ken tokaut long sampela toktok i mekim bel bilong yutupela i kamap longpela moa moa yet."


"Bikos, sapos yu larim bel bilong yu i stap longwe long brata o susa bilong yu....wanpela de bai yu no inap go na kamap moa...bikos em i stap longwe tumas pinis..."

Ol tok pait long K5 milien donesen long Lutheran Sios

EVANJELIKEL Lutheran Sios long PNG (ELC-PNG) i kamap long nius long dispela wik long ol toktok long ol milien kina mani we sios i kisim long sevim Lutheran Siping na tu, statim Lutheran Sios Yunesiti.

Ol ripot long midia i tok K5 milien sekmani we Praim Minista i bin givim long sios las mun long bikpela sinod bung long Finsafen nau i go bek long Treseri Dipatmen long Waigani, bihain long olpela Hetbisop, Reveren Giegere Wenge, i givim i go bek long Treseri.

Tasol long dispela wik, Praim Minista i tokim Volanteri Likwidesen Supavaiseri Komiti bilong sios Siaman, Bart Philemon long kisim bek sek long Treseri na yusim long as stret we em i bin givim sek long en.



VOT LONG MAKIM HETBISOP: Barry Wilson bilong ELC-PNG Papua Distrik i putim vot bilong em long bokis las wik insait long namba 30 ELC-PNG sinod long Finsafen. Foto: Paulus Tali

Dispela em long helpim na kirapim bek gen Lutheran Siping.

Ol ripot long midia i tok Reveren Wenge, husat i no moa hetbisop nau bihainim sinod ileksen las mun i lukim Reveren Jack Urami i winim vot na kamap nupela hetbisop, i tok em yet i bin

putim sabmisen o ripot long askim gavman long helpim Lutheran Siping i bin stap long hevi, na em i mas gat toktok long rot ol i yusim dispela mani long en.

Long 2014, ol i bin pinisim sevis bilong Lutheran Siping bikos kampani i bin gat K27

milien dinau we i putim kampani long mani hevi na olsem, sios i bin askim long mani sapot .

Long ol ripot, wanpela mausman long opois bilong Praim Minista O'Neill i tok Reveren Wenge i no ken holim bek o yusim K5 milien long ol narapela samtkng bikos em

i gat wok bilong em long helpim kirapim bek Lutheran Siping Kampani.

Long ol ripot, askim i go nau long Reveren Wenge i mas givim bek mani i go long Volanteri Likwidesen Supavaiseri Komiti bilong sios we Mista Philemon i go pas long en.

Ribat askim ol sios long stopim vailens long ol meri



OL MAMA LONG BUNG: Ol mama bilong Resureksen Sios i kisim poto long taim bilong sinod. Foto: Paulus Tali

OL sios long PNG i mas toktok strong o mekim samting long daunim pasin bilong mekim nogut na paitm ol meri.

Asbisop John Ribat bilong Pot Mosbi Katolik Asdaiosis na Siaman bilong Kristen Lidasip Alaiens long HIV-AIDS, i wokim dispela toktok bihainim pasin bilong bagarapim ol yangpela meri long Morata long las mun.

Asbisop Ribat i tok ol hetman bilong ol sios long PNG na ol pasto olsem ol papa bilong ol sipsip i mas kamap ol papa na givim strongpela na gutpela lidasip long daunim na pinisim ol hevi bilong jenda vailens long ol tok skul bilong ol long sios, ol Baibel skul, ol komyuniiti autris ministri na program.

Em i tok ol pasin bilong autim tok na ol tok skul i mas egensim ol kain pasin olsem vailens agensim ol meri na mekim nogut long ol meri.

Em i tok ol, dispela samting i kamapim hevi i no long ol meri tasol, no gat.

Em i kamapim hevi long ol famili, komyuniiti na so-saiti.

Lukluk long Bikpela na wok bai ran gut

STAT bilong nupela yia em i taim we planti gavman dipatmen long dispela kantri i save wokim dedikesen o sios sevis long askim Bikpela long stiam wok bilong ol i ken ran gut.

Las wik i bin lukim PNG Difens Fos i

wokim dedikesen sevis long Sen Martin Angliken Sios long Boroko.

Planti handet soldia i bin kamap long dedikesen sevis, na ol i bin kisim salens long lukluk long Bikpela na putim em pastaim taim ol i mekim wok bilong ol. Saplen biloing ol,

Kenel Misiel Baude i bin wokim dispela toktok i stap long Buk bilong Jenesis we Bikman i bin toktok long Abraham na tokim em long wok-about bihainim em na no ken kisim tok sut.

Em i bin tokim ol soldia olsem ol i nidim ol lo bilong

God long stap laip, na tu, mekim wok bilong ol. Na long inapim dispela, namba wan samting ol i mas mekim em long wok-about long stretpela rot na lukluk long Bikpela.

Long wankain taim tu, ol Judiseri Sevis long Mosbi i bin

holim dedikesen sevis long Kaugere Foa Skwea sios long NCD.

Senia Pasto bilong sios, Rodney Tomuriesa i bin singaut long ol memba bilong judiseri o ol loman long putim Bikpela pastaim long olgeta samting ol i mekim.



KOMENTRI

Pasin bilong stil long solwara i bagarapim ol pipel bilong yumi

WANPELA bikpela hevi bilong lo na oda sampela provins i wok long lukim nau em dispela pasin bilong stilman i hensapim ol lain i ran long bot na stilman, o kago.

Narapela nem bilong dispela kain stil pasin em, si pairesi. I gat moa ripot bilong dispela kain stil pasin i save kamap long ol nambis bilong Morobe, Milen Be na long sampela han bilong Sepik wara.

Na long sampela ples, ol stilman i save yusim ol bot long ranawe bihain long ol i hensapim ol man o stua long taun.

Dispela hevi i soim olsem ol polis bilong yumi tude i sot long ol spit bot na ol polis bilong was na stopim dispela pasin bilong stil.

Em i soim tu olsem dipatmen i mas gat baset na plen bilong skulim ol polis man na meri long stopim dispela hevi we ol stilman i save yusim ol bot.

Em i soim tu olsem i mas gat wok bung i kamap namel long polis na provinsal gavman na ol lida bilong ol ples arere long nambis.

Em i soim olsem i mas gat wok bung i kamap namel long ol gavman dipatmen olsem maritaim divisen bilong Transpot Dipatmen.

Na i mas gat wok bung wan-



taim dipatmen i lukautim wok bilong kostal redio.

Yumi amamas long lukim olsem wok i kamap pinis long strongim polis modenaísesen program na yumi hop dispela wok bilong stopim pasin bilong stil long solwara, o si pairesi, i stap insait long dispela program tu. Taim i senis nau, na yumi

stap insait long 2016 na ol stilman tu i wok long senisim pasin bilong brukim lo, olsem na ol polis i mas gat rot bilong stopim ol dispela kain pasin nogut.

Wan wan provins i mas wok bung wantaim ol polis long stopim dispela pasin bilong ol stilman i hensapim ol pasindia long solwara.

Oltaim yumi save harim nius bilong ol politikal lida i baim ol ekspensiv ten sita kar na givim long ol polis.

Watpo bai ol i no inap baim ol bot tu long helpim wok bilong ol polis?

I gat bikpela nid tru long skulim ol polis long pasin bilong yusim spit bot long wok bilong ol.

Planti taim ol polis i no inap holimpasim ol dispela stilman bikos ol i no gat bot.

Na sapos Dipatmen bilong Polis i no inap kamapim wara patrol bot seksen bilong en, orait skelim sampela arapela rot bilong raunim na arestim ol stilman bilong solwara.

wara.

Dispela pasin bilong hait long solwara na stil long ol manmeri em i wanpela rabis pasin tru.

Ol tarangu manmeri bilong ples i save bungim bikpela salens tru long ran long bot na long taim ol i bungim birua long han bilong ol stilman, em bai

dabolim wari bilong ol moa yet. no gat bikpela mekimsave tumas long taim ol dispela stilman i kamap long kot olsem na si pairesi bai i no inap long pinis.

Ol polis i luksave pinis long dispela hevi na i wok wantaim komyuniti long holim ol lain i save kamapim dispela pasin nogut.

Tasol bikpela askim i mas gobek long ol wan wan komyuniti. Sapos komyuniti i luksave long dispela hevi watpo na ol i no kotim ol stilman long polis? Sapos wanpela famili o wantaim brukim lo, orait kotim em.

Pasin bilong haitim brata, o pikinini o kandere husat i brukim lo, bai i no inap stopim ol hevi bilong lo na oda.

Planti taim ol komyuniti i save long husat i brukim lo tasol ol i no tokaut bikos ol i pret long pasin bilong bekim.

Nogut ol i kotim man na famili bilong em bai tanim bek na bagarapim ol.

kain tingting na pasin em i bilong taim bilong ol tumbuna. Tude PNG i stap insait long 21st senturi na yumi klia long lo na oda na pasin bilong sindaun gut.

Em i wok bilong yumi wan wan long helpim ol polis long stopim dispela pasin bilong stil long solwara o si pairesi.

Lidaman no ken tok egensim Praim Minista tumas

WANPELA lokal lidaman bilong Viles Kot long Morata, Nesenel Kepital Distrik, i tokaut long Wantok Niupepa long las wik olsem em i no bin amamas long toktok bilong Oposisen Lida na Memba bilong Kandep, Don Polye na Anderson Agiru, Gavana bilong Hela provins.

Peter Kay bilong Yabipini viles long Pangia Distrik husat i senia viles kot mejistret bilong Morata Viles kot, i tok em i no bin amamas long wanem toktok i bin kamap insait long Wantok Niuspepa bilong 14 Janueri 2016 we tupela lidaman bilong Hailans rijon i bin putim long midia.

Sampela tok piksa mi laik mekim long yai olsem. Diwai stap long pablik ples em ogeta lain bai putim han mak long skin bilng en bai yu lukim bagarap nogut tru. Na diwai i gat nem o nogat nem ol i hait na stap em yumi save sampela pait diwai, sik diwai na smel diwai oslem bus i stap ya em gutpela tasol yumi lukim.

Namba tut ok piksa, insait lnog PNG i gat wan wan man bilong karim pik i stap.

Taim em katim pik bai em i kisim wanepela namba wan mit long dispela pik na taim em skelim em save skelim gut tru na olgeta manmeri ol i save wanbel gut tru.

Na tu mi ken tok olsem yumi Papua Niugini i save dispela as bilong olgeta diwai wanpela i no save stap nating olgeta yet i gat demon satan i save stap.

Lukluk na save bilong mi em olsem. Lida wok bilong Praim Minista wantaim ol i ranim kantri gut na 85 pesen bilong pipel i amamas long gavman bilong tude. Na tu olgeta hap we lait i no go long en O'Neill i sutim lait i go insait lnog Papua Niugini.

Dispela tupela lida i mas lukluk na skelim gut na tok save i go long midia na pablik na pipel bai amamas.

Long tupela lidaman i

mekim gutpela tok. Mi laik tok olsem sapos lida wok bilong Peter O'Neill i no gutpela wantiam Pangia lalibu ilektoret, em 2017 Peter O'Neill bai i no inap kam bek long Palamen.

Olsem na Adnerson Aigru na Don Plye tupela ken kam na resis long Praim Minista sit. Dispela tupela lida man long Hailans i tok olsem na mi ken tok olsem lukluk bilong mi long gavman bilnog O'Neill i bin mekim olgeta samting pinis olsem na taim tupela i kisim Praim Minista sit em tupela bai brukim solwara na kisim i go long Hailans.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

WOL Helt Ogenaisesen long dispela wik i tokaut olsem Zika virus o binatang i kamap nau long mak bilong global helt imejensi, o wanpela bikpela sik long wol we ol i mas mekim samting nau long stopim.

Dispela disisen long tokaut long sik we ol moskito o natnat i kamapim olsem em i pablik helt imejensi, moa mani na ol risos i mas go long ol saientis i karimaut moa risets wok long dispela sik we i wok long gro bikpela.

Dispela em i namba 4 taim WHO i yusim long skelim na glasim, na wokim disisen bihainim pastaim we o rot WHO i bin mekim long Ebola long yia 2014, na HINI long 2009.

Ol i bilip strong olsem i gat koneksen namel long Zika virus na ol sik long kru, tasol i no gat evidens long sait bilong sains yet,



Zika Virus ei helt imejensi long wol

Margaret Chan, em Dairekta Jenerel bilong WHO i tok taim em i glasim wantaim sik we ol bebi i save bon wantaim liklik het, na tu, narapela sik man i no nap sanap o wokabout ol i kolim long Guillain-Barre syndrome.

Em i tok WHO i no gat as long tambuim ol manmeri i raun i go na i kam long stopim binatang bilong Zika virus i kalap i go long narapela man.

25 kantri long wol nau i gat Zika virus.

Dispela sik i kamap bikpela

nau long Brazil we i bin kamap pastaim long en na ol narapela kantri long Sentrel na Saut Amerika i kisim tu. Long Amerika, ol i ripotim sampela lain wantaim dispela sik na moa yet, ol lain i raun i go long dispela hap.

DISPELA piksa i kamap long vidio we ol grashopa i bagarapim ol fam na ol ples long Argentina, Saut Amerika, i no wanpela Holiwud muvi, tasol i trupela samting.

Planti tausen grashopa i bagarapim ol fam na viles long Catamarca, Santiago del Estero, Tucuman na Córdoba. Ol grashopa i bin kamap long Argentina pastaim long ples ol i kolim long Santiago del Estero long las yia Julai.

Vidio i soim planti tausen grashopa i pulap kapsait long fil taim ol narapela vidio i soim i pulap na karamapim fil, ol diwai na ausait bilong ol bilding.

Ol ripot i tok laspela gavman i no bin mekim samting long edresim dispela hevi bilong ol grashopa, tasol dispela i senis wantaim nupela gavman, Juan Pablo Karnatz, em



Ol grashopa i bagarapim Argentina

membra bilong Rurel Konfederesen Bod long Argentina i tokim ABC Nius long imeil.

Dispela em bikpela bagarap o hevi bilong ol grashopa Argentina i bungim insait long 50 krismas nau.

I gat moa long 100 keis we

ol grashopa i kamapim bikpela hevi na tu, bagarapim moa long 700 tausen hekta o graun eria long Argentina i kam inap nau.

Ol tok lukaut tu i go long ol kantri we dispela hevi bilong ol grashopa i bagara-

pim ples i ken kamap' olsem long notwes Afrika, Hoin bilong Afrika na Jemen.

Ol ripot i tok sapos ol bikpela ren i pundaun long dispela yia, bai moa moskito i kamap na dispela i no gutpela stret.

Bikpela aisren na ol rot long abrusim flu



taim yu lukautim ol siklain

BIKPELA aisren long Is Kos bilong Amerika i kamap long taim bilong flu we Senta bilong Disais Kontrol i tok i save kamap namel long Desemba na Febueri.

Taim aisren i kamap, planti lain bai stap insait tasol long haus we ol famili memba o wanskul i gat flu i stap.

Hia em sampela rot yu kemn bihainim long abrusim long kisim flu o sil taim yu helpim ol lain bilong yu.

Han i mas stap klin

Drokta Frank Esper, em infekses disis speselis loong Yunivesiti Hospitals Keis Medikel Senta long Clevelen i tok namba wan samting em long wasim han olgeta taim bikos pipel i save yusim han long taim ol i bung wantaim.

Esper i tok yusim olpela sop we yu save yusim long 20 na 30 sekon i bikpela samting na pipel i no inap

wari long painim anti baiotik sop.

Long ol husat i sik, karamapim maus taim ol i kus na snis. No ken yusim han bilong yu long karamapim maus, tasol yusim elbo o narapela sait bilong han.

Putim ol siklain long narapela hap

Dokta William Schaffner, em wanpela ekspet long in-

fekses disis long Vanderbilt yunivesiti i tok putim ol siklain long narapela rum o hap i longwe i wanpela bikpela samtign long stopim sik i kalap long ol narapelaEm i tok putim ol long narapela rum na givim ol mobail fon long ol bai toktok long yu taim ol i laikim helpim, TV na kompyuta.

Em i tok klinim wantaim wetpela klos ol windua na ol narapela hap i gat sop long en long stopim binatang i

Presiden bilong Cyprus i tok UN no ken hariapim pis dil

PRESIDEN bilong kantri Cyprus, Anastasiades, i mekim tok lukaut i go long UN Jenerel Seketeri, Ban Ki-moon.

Em i tok kantri i laikim inap taim long redi long kamapim dil o agrimen we bai yunaitim o bungim wantaim tupela wanpisin em Grik na Tekis Cypriot long no sapotim insait long wanpela referendum, o vot long bruk lus.

Stat yet blong yia 1974, ol i bin holim planti ol pis tok-tok taim ailan i bruk. Dispela i kamap taim Turkey i

bin go insait na militeri ku o ami i tekova, wantaim tingting long yunaitim Greece wantaim Turkey.

Nau yet, moa long 35,000 ami bilong Turkey i stap sambai long not bilong ailan, na tu, Turkey em wanpela kantri tasol i luksave long ol Turkish Cypriot i kisim in-dipendens.

Anastasiades i tok i mas gat ol toktok namel long tupela sait long edministresen, mama lo, na taim bilong ami bilong Turkey i lusim Cyprus.

Moa refuji pikinini dai long nambis bilong Yurop

...Pilim sori pasin i no tumas

MOA refuji pikinini i kamap sua long ol bot long ol nambis bilong Yurop, tasol i no gat bikpela meknais i kamap olsem dispela long tripela mun i go pinis taim liklik pikinini bilong Syria, Aylan Kurdi, i gat tripela krismas i bin dai long solwara long nambis bilong Turkey taim ol i kamap long hap long sip. As long dispela em long taim we samting i kamap, watpo em i kamap na pawa long pote we las Septemba i bin kamapo long liklik mangki ya.

Narapela samting tu em, ol sip wantaim ol refuji i wok loing kamap long ol sua bilong Yurop long olgeta de, o go daun long solwara olsem dispela i bin go daun long nambis bilong Turkey las wik we 37 pipel i gat ol liklik pikinini na bebi i bin dai long en.

Pipel i no bisi tumas moa bikos long ol sampela samting i kamap pinis.

Em long pretpasin we ol refuji i ken kamapim hevi

long ol meri i ken mekim na pipel i no gat sori pasin tumas. Na Yurop i mas painim rot long stretim hevi bilong ol refuji.Sampela i stap isi tasol na i no mekim samting long givim helpim, na tu, ol i no laik lukim ol piksa o vidio bilong ol refuji i bungim hevi na dai loing solwara.

Tu, bihainim birua long Paris, Frans we tupela strongpela het refuji i bin miiks wantaim ol narapela na kamap long Frans, tasol ol i wokim teroris atek na kilim dai planti pipel i mekim ol pipel i pret na no bisi, na stap isi.

Long siti bilong Cologne long Gemeni tu, sampela meri i bungim hevi long sampela refuji na tu, sampela i wokim stil pasin.

Moa piksa na vidio liong ol refuji pikinini i bungim hevi na bagarap na go daun long solwara i kamap long Yurop tasol pipel i no bisi tumas moa.

kalap i go long ol narapela man.

I toktok long dokta long kisim anti varel

Taim yu lukim sain olsem yu gat insait long 48 awa samting, singautim dokta bilong yu na askim em sapos yu ken kisim anti varel taim yu kamap long haus sik., Schaffner si toEm i tok dispela bai helpim yu long kamap orait kwiktam, o

stopim binatang i kalap long ol narapela.

Dringim planti wara na bai yu stap helti, em i tok.

Kisim sut bilong flu em i bikpela samting long stap helti long taim bilong winta o kol taim sik flu i save kamap bikpela. Maski em mi save kisim tupela wik bipo sut bilong flu i wok, Esper i tok long ol mun i kam, mak bilong pipel wantaim flu bai go antap moa.

Ples bilong malolo na pinsim laik

Ol pikinini na ol lapun manmeri tu long Mosbi i save amamas long raun i go malolo na piknik long Adventure Park long 14 Mail. Em i wanpela seif hap we i gat ol samting bilong amamasim ol pikinini na we yu ken malolo gut long raun long laik hap. Ol dispela poto i soim ol famili i amamas long raun insait long Park na we ol pikinini i pinsim laik. Ol poto stori Anna Solomon



Ol pikinini i pilai long wara slaid.



Ol giaman dainaso long seksen bilong Jurassic Park.



Sikau bilong diwai i kaikai pinis na slip isi i stap.



Raun long liklik trein.



Liklik Ciara i spin raun long park.



I gat planti spes na ples bilong malolo.




Ol famili i malolo na raun long laik.

Ron wantaim Wantok...

ROT PINIS: POT Mosbi i lukim planti senis long ol haus na ol bikipela rot. Tasol san i wok long strong tumas na planti ol gras na diwai i wok long dai na dispela i mekim ol manmeri na pikinini long Mosbi i piliim stret hot bilong san.

Ol wok man husat i wok long mekim rot rot tu kisim taim long san na planti hap rot ol lusim na go mekim ol narapela rot we i gat ples kol long en. Dispela bikipela rot we bai joinim Gerehu bek rot wok i no pinis gut yet. Ol wok man i lusim na go wok long liklik han rot insait long ol haus long Gerehu.

Na dispela rot ol lusim na ol i no putim Kolta yet na taim san i hot na win i kam ol lain klostu long dispela rot save kisim win wantaim das. Wankain taim tu wara i sot na sampela ol haus lain save slip wantaim das long bodi bilong ol.



TOP PAWA LAIN YA: Dispela helikopta em bilong ol PNG Pawa, long wiken ol mekim wok lukluk raun long ol bikipela pawa lain na bikipela pawa pos long Mosbi na sekim sapos i gat sampela hevi long ol pawa lain na pos. Taim dispela helikopta i kam flai daunblo stret na sekim ol pawa lain long Gerehu, em pulim ai bilong planti manmeri na pikinini.

Ol ran go na tata long ol lain insait long dispela helikopta. Planti bilong ol pikinini i wanbel stret long lukim dispela helikopta kam daun stret na ol ken lukim kain kain masin insait long dispela helikopta bilong sekim ol pawa lain. Pot Mosbi nau yet i wok long kisim blekaut klostu klostu ating planti senis i wok kamap long stret ol pawa insait long siti.






SAIT MANI: Planti bilong yumi save gat wok bilong yumi stap long mekim na long taim bilong pe wik kam yumi save kisim pe. Tasol long wiken bai yumi stap nating long haus na skin dai wetim Mande na yumi go bek long wok gen.

Sampela wok ol manmeri save painim long mekim long wiken long kisim sampela sait mani. Sapos yu save long wanpela wok na ol manmeri painim yu long wiken em dispela wok em bilong yu yet, laka.

Olsem dispela sain raita, ol save lain bilong em save long em na kisim kar bilong ol go long em raitim sampela toktok long sait bilong kar bilong ol wantok na pren bilong em. Em tu putim ai long taim em mekim dispela stail wok bilong em.

Em nau! Ol pikinini i ken painim rot i go long ples wantaim Wantok kru...



Ol wod lista hia:

- AISBLOK
- ALTA
- ANANIT
- BATEN
- BIHAIN
- DIWAI
- DOKTA
- DRAIBISKET
- FOPELA
- FOTNAIT
- GRAUN
- GRILEGLAS
- HAMBAK
- HAMAS
- INDEPENDENS
- INTAVIUA
- JISAS
- KAMAPIM
- LIMBUM
- MANGI
- NARAPELA
- ORAIT
- PAMKIN
- SKWAT
- TEPRIKODA

S E L G F R A A I J S T E T E Q L S O Q
 I S T B G M A N G I N N A T I S D A F N
 N Y Q A S V A I P S I W D Z H A H N L Y
 D C V T F O P E L A K R R K P E H H I E
 S I L E M R R S U S D O K T A A A H T E
 P P W N A A H I I P O R S S R D M T T A
 A A C A N H V T G C O O N D O I B G L B
 N G U N I A O G O O S Q R K P H A M O V
 R O P A T G E J A N S D I A F A K B P Q
 E C L N A R A P E L A R M S I O I E I K
 P I I I I I N D H E P A T G L T S S Y O
 E J M T F L N H K E K I U B R F S A F E
 E T B O A E L H T A A B S I M A S Y T M
 Y B U S P G L R T N P I C H M I U V E L
 L X M E S L R L T Z A S G A I D E N R D
 L B D Y E A A O S B M K H I A C Q E S O
 E N V M P S F D R N K E A N J O O D L A
 I R K T T E O O O R I T A Q O G V I H N
 Q F F P K I O S N R N R R J N X L A N U
 I T E T E I S R J D I D C W F E T O N O

Stori bilong tumbuna

TOROSSEL NA BATAFLAI

Torosel (pon) na Bataflai (bobo-im) long taim bipo tupela gutpela pren. Wapela taim tupela go raun long bus. Bobo-im save flai antap na pon i save wokabaut long graun. Pon no inap lukluk i go longwe tumas bilong wanem em stap long graun. Olsen na em save putim iau long bobo-im husat i flai antap na lukim olgeta samting na save stori go bek long em.

Tupela raunraun i go, na Pon em hangere nau. Em i askim sapos bobo-im i ken lukim wapela gaden i stap klostu long ol. Bobo-im i tokim em olsem gaden bilong tupela lapun, Kakam (man) na Manduat (meri) i stap klostu. Olsen na Pon i bihainim Bobo-im na tupela i go. Bobo-im i lukim wapela mau han banana na go sindaun antap na kaikai stap. Pon isi isi i kam bihain na singautim pren bilong em long tromoi banana i go daun long em. Tupela i mekim save long kaikai stret na lus tingting long was long papa na mama bilong gaden.

I no long taim, tupela lapun i wokbaut i kam long gaden. Bobo-im i lukim tupela i kam na toktok isi long pren bilong em Pon. Pon li aik ronawe tasol bel bilong em i pulap tumas na em i hevi long wokabaut. Bobo-im i go daun karamapim pren bilong em long lip banana na em i flai hariap i go.

Kakam na Manduat i kam lukim banana bilong tupela na bel bilong tupela i hevi stret. Tupela i kros nogut tru. Bel bilong tupela i hevi stret na skin bilong tupela i les long wok. Tupela i sindaun long as bilong banana na stori stap.

I no longpela taim, Pon i kapupu. Tupela lapun kirap nogut. Kakam i sutim tok long meri bilong em olsem em i kapupu. Manduat i bekim na sutim tok tok i go long man bilong em olsem em i kapupu. Tupela lapun mekim olsem go na ino longtaim Pon kapupu gen. Dispela taim win bilong as bilong em apim lip banana na tupela lapun i lukim.

Hariap tru, Kakam i go apim lip banana na painim Pon slip i stap. Yu tasol yu stil man long gaden bilong mitupela. Nau bai yu bekim hatwok bilong mitupela. Tupela lapun i pasim Pon long diwai na karim i go daun long ples.

Tupela i tok save long ol man na meri bilong ples long go painim kaikai bilong gaden na bai kam kukim wantaim torosel.

Ol i pasim torosel long nambis klostu long solwara na olgeta bikman na meri go painim kaikai long gaden. Ol i tokim ol pikinini long pilai long nambis na was long torosel.

Pon i lukim ol pikinini tasol stap na em wokim gi-aman toktok long ol. Ol pikinini kam lusim rop long mi na kisim mi go kolostu long solwara bruk long em na bai yumi pilai. Ol pikinini i lusim rop na kisim em i go daun. Em i giaman pilai wantaim ol na suruk isi isi go daun long solwara.

I no longpela taim wapela bikpela solwara bruk kam insait wasim em, na em i kalap na swim i go insait. Em singaut long ol pikinin olsem, 'mi gi-manim yupela tasol ya. Kaikai pekpek bilong mi' na em i swim i go ausait. Taim ol papa mama kambek long gaden ol pikinin tokim ol long giaman bilong torosel na ol i kros nogut tru. Bel hat bilong papa na mama long torosel i ronawe, ol putim go antap long ol pikinini, na long dispela wapela nait ol pikinini i no slip gut. Ol i kisim bikpela pen.

Stori Tumbuna by Mr. Luke Ramtonic
 The legend originated from Tuam Island, Siassi, Morobe Province



TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Gavman bilong Australia i helpim Bogenvil referendum awenes



Ol paitman bipo long Bogenvil, em ol BRA na Resistens i kamapim wanbel pasin long Katukuh, Siwai long Saut Bogenvil. Foto: ABC

GAVMAN bilong Australia aninit long Dipartmen bilong Foren Afeas na Tred nau i wok long helpim ol yangpela pipel bilong Bogenvil long save gut long Humen Raits na tu ol wok redi long Referendum bilong Bogenvil.

Nem bilong dispela projek em Youth Lukaut program

na i karamapim ol yangpela husat i gat krismas namel long 18 na 30 yia.

Dipartmen bilong Foren Afeas na Tred i wok bung wantaim bikipela NGO grup long Bogenvil, Leitana Nehan Dvelopmen Ejensi long dispela program.

Dairekta bilong Leitana Nehan Dvelopmen Ejensi,

Helen Hakena i tok planti ol dispela yangpela manmeri i no save gut long raits bilong ol na raits bilong ol narapela pipel.

Long mun Mas, ol dispela yangpela pipel bai stap insait long wanpela bikipela Humen Raits Musik Festival long strongim save bilong ol long Human Raits.

Enga polis i yusim sosel midia long daunim sanguma pasin



Enga polis i yusim sosel midia long stopim pasin bilong sutim tok long posin na sanguma.

Wanpela senia polis opisa long Enga i wok long yusim sosel midia long daunim pasin bilong kilim nating ol meri em sampela lain i sutim tok olsem ol i sanguma meri.

Epenes Nili, Ekting Polis komanda long Wabag Distrik i yusim telepon, intanet,

radio, ol niuspepa na televisen long tokim ol pipel olsem dispela pasin bilong kilim nating ol pipel em i brukim lo bilong kantri na God.

Long 2015, sampela lain i bin kukim foapla meri long paia na kisim vidio piksa long ol na putim long in-

tanet we planti pipel tru long wol i bin lukim.

Wanpela long ol dispela meri i bin dai, na Nili i tok ol dispela pasin bilong bilip long sanguma i no stret na i mas stop.

Em i askim tu gavman long kamapim ol strongpela lo egensim dispela pasin.

Ol Vanuatu pipel no laik pasin bilong korapsen



Ol pipel i vot long Vanuatu.

Planti komyuniti lida na tu ol pipel bilong kantri i no laik ol nupela memba bilong Vanuatu palamen i mekim ol pasin korapsen. Ol i tok ol nupela memba bilong palamen husat i winim snep ileksen long Vanuatu i mas save olsem ol inap go kalabusapos ol i mekim pasin korapsen.

Dispela em toktok bilong Ni-Vanuatu komyuniti lida na bisnisman husat i save helpim ol pipel bilong Vanuatu long wok long Australia na Nu Silan long Pacific Workers Scheme.

John Salong i tok planti pipel long kantri nau i laik ol nupela palaman memba

long wokbung na stretim ol wok developman, na tu bringim ol sevis olsem helt, edukesen, ol rot, bris na ol narapela samting olsem.

Ol i bin holim dispela snap ileksen bihain long Suprim Kot i bin kalabusim 14 ol palamen memba long korapsen na braiberi long 2015.

No ken wari tumas long Zika Virus: Dr Abdad

Taim planti milien pipel long not na saut Amerika i go het long wari nogut, wanpela dokta i tok ol pipel bilong Pasifik Rijon i no ken wari tumas long dispela binatang wanpela moskito i save kamapim, Zika virus.

Dispela em toktok bilong man husat i go pas long en-vironmental na imejing disises wantaim Institut ov Medikol Risets long Goroka,

Dokta Yazid Abdad.

Dokta Yazid i mekim dispela toktok bihain long bikipela wari i kamap nau long Saut Amerika na tu long Sentral na Not Amerika olsem dispela sik i mekim planti pikinini i gat liklik het o ol i kamap disabel.

Planti mama nau long Brasil i karim ol pikinini husat i gat liklik het na ol saveman i sutim tok long binatang bi-

long wanpela moskito i kamapim dispela hevi.

Long Pasifik rijon, Samoa, i gat dispela sik pinis, na tu Australia nau i givim tok lukaut long ol meri husat i gat bel long no ken go long Brasil long Olympik Gems long dispela yia.

Dokta Abdad i tok tu olsem dispela moskito i save kamapim tu ol kain sik olsem chickengunya na dengue fiva.

Solomon gavman i redi ol nupela lo

Kolisen gavman bilong Praim Minista Manasseh Sogavare long Solomon Ailan i gohet long wok long sampela bikipela lo em bai putim long taim palamen i bung gen. Narapela bung bilong Palamen bai kamap long mun Epril na Me long dis-

pela yia.

Pres Seketeri bilong Praim Minista, Deli Oso i tok namel long ol lo ol bai kisim i go long palamen em i dispela Independent Commission Against Corruption o ICAC lo.

I bin gat planti toktok long sosel midia long gavman i

mas kamapim dispela lo bilong stopim korapsen insait long gavman sistim bilong kantri.

Misis Oso i tok narapela lo em dispela lo bilong kamapim ol Spesel Ikonmik Jon long kantri we ol ovasis investa i ken go developim.

MRDC stretim tupela Pasifik haus

MINERAL Resources Development Company (MRDC) i wok long mekim bikpela mentenens wok long tupela bikpela stori bilding long Pot Mosbi.

Taim MRDC i kisim Pacific Property Trust (PPT), MRDC i stat mekim ol bikpela mentenens wok long tupela bikpela komesal propeti long Pot Mosbi we PPT i save lukautim.

Dispela tupela haus em i Pasifik MMI Biding na Pasifik Ples Biding.

Taim MRDC i tekova long PPT long yia 2014, em i wok long mekim ol bikpela mentenens wok olsem bilding odit we dispela wok odit i sekim pawa saplai, paia na imejensi, ea kondisen sistem, lift na straksarel tes.

Menesing Dairekta bilong MRDC, Augustine Mano, i tok taim MRDC i bin kisim ples bilong PPT olsem trasti o papa bilong dispela tupela haus, em i bin painimaut olsem planti samting long dispela tupela biknem haus i no bin stap stret.

Mista Mano i autim dispela toktok taim NCD Helt Divisen i bin painimaut olsem Pasifik MMI Biding i no bin stap gut bikos ea kondisen bilong dispela haus i no bin stap wok gut.

Pot Mosbi we ol samplea bikpela olsem Turisim Promosen Atoriti (TPA), Embesi bilong Saut Korea, Pasifik MMI Insurens, Pasifik Balens Fan, Melanesian Trustee Services Ltd (MTSL), Pacific Equities & Investments Ltd (PEIL), Niugini Eneji, na Air Niugini opis i stap long Pasifik MMI Biding.

Tupela kampani MTSL na PEIL i bin kamapim PPT long yia 2003 na MTSL i bin kamap trasti o ona bilong dispela tupela haus taim PEIL i bin kamap bilding menesa o kampani bilong lukautim dispela tupela haus.

Kontrak bilong tupela MTSL long kamap olsem trasti na PEIL long kamap olsem bilding menesa i bin pinis long Jun 10, 2014 taim MRDC i bin baim PPT.

Wanpela sabsideri kampani bilong MRDC, Petroleum Risos Kutubu, i gat bikpela sea long PPT ba ol arapela manmeri o investa i gat liklik sea i stap long PPT.

Namel long yia 2003 na 2014, dispela tupela komesal propeti, Pasifik Ples na Pasifik MMI stori bilding, wantaim wanpela graun nating i stap arere long sait bilong Pasifik MMI Biding long daun taun Pot Mosbi, na ANZ Haus long Lae, Morobe Provins, i bin stap aninit long lukaut bilong PPT.

Na PPT i bin stap aninit long was na menesmen bilong MTSL na PEIL. Tupela MTSL na PEIL i bin ranim PPT long 10-pela yia i kam inap Jun 2014.

Long Julai 2011, paia i bin kukim ANZ Haus long Lae. MRDC i bin kisim ples bilong MTSL olsem trasti bilong PPT long Jun 10, 2014 taim MTSL i lusim wok bilong em olsem trasti. Long wankain taim, PEIL tu i bin lusim wok bilong em olsem fan menesa.

Wantok Niuspepa i bin laik long kisim tingting bilong PEIL na MTSL tasol tupela kampani i lusim opis bilong tupela long Pasifik MMI Biding na i go aut pinis.

Mista Mano i tok taim MRDC i bin tekova long wok bilong tupela MTSL na PEIL, em i bin mekim ol wok odit long sekim sapos Pasifik Ples na Pasifik MMI haus i stap gut.

Dispela wok odit i bin painimaut olsem tupela haus i no

bin stap gut bikos ol samting bilong haus i bin bagarap na dispela inap long kamapim bikpela hevi long dispela tupela haus, ol manmeri husat i save stap insait na ol arapela manmeri long pablik.

Mista Mano i tok ol samting bilong dispela tupela haus i no bin stap gut bikos i no gat wanpela wok mentenens i bin kamap long ol yia bipo.

Em i tok planti ol samting long dispela tupela haus i abrusim pinis mak bilong mekim mentenens na i nidim bikpela mentenens wok hariap tru long larim sefti bilong haus na manmeri i stap gut.

“Dispela wok odit i panimaut olsem tupela haus i mas karimaut ol wok mentenens na senisim olgeta pawa saplai sistem olsem pawa rop, suits, na ol samting bilong yusim pawa.

“Long mun Mas las yia, MRDC i bin bihainim toktok bilong dispela wok odit na i yusim K6.63 milien long mekim wok mentenens bilong ol samting bilong pawa long Pasifik Ples na Pasifik MMI Biding,” Mista Mano i tok.

Dispela wok mentenens i bin stretim na putim gen nupela lait, nupela mita bilong pawa, nupela masin bilong sekim strong bilong pawa, nupela masin bilong daunim na apim strong bilong pawa, na baim nupela stenbai jenereta.

Dispela ol wok mentenens bilong pawa i pinis long mun Desemba 2015. Taim PPT i pinisim ol dispela wok mentenens bilong pawa, dispela i lukim PPT i sevim moa long 40 pesen bilong pawa bil.

Long mun Julai 2015, MRDC i bin yusim gen K2.91 milien long mekim ol mentenens wok bilong paia, sefti na imejensi long dispela tupela haus.


Wok odit bilong paia, sefti na imejensi i bin painimaut olsem ol samting bilong daunim paia sapos haus i paia na ol sefti samting i no bin stap gut.

“Ol samting olsem rop na paip bilong wara, dua bilong abrusim paia na i go aut, rop o hos bilong kisim wara taim paia i kirap, na bekap wara tenk i no bin stap long stopim paia sapos paia i bin kirap na kukim dispela tupela haus,” Mista Mano i tok.

Wok mentenens bilong ol dispela namba wan samting bilong paia na sefti i bin pinis gut tru long mun Desemba 2015.

Ol arapela bikpela mentenens projek we MRDC i yusim bikpela mani na wok long mekim long stretim tupela haus wantaim em ol:

- Pasifik MMI Biding lift apgret projek;
- Ea Kondisen Sistem apgret;
- Sekyuriti Sistem apgret;
- Bikpela apgret bilong Biding Menesmen Sistem bilong tupela bilding;
- Mentenens wok bilong insait bilong tupela haus wantaim; na
- Nupela restuaran o haus kai na kefei long level 1 bilong Pasifik Ples bilding;



Pasifik Ples Biding

Mista Mano i tok MRDC yet i gat ol wokman bilong fiksman na mekim ol mentenens wok long dispela tupela haus na tu ol i wok long kisim ol speselis bilong mekim ol mentenens wok.

Mista Mano i tok long Janueri 22, 2016 ol Helt Inspekta bilong NCDC i bin go sekim Pasifik MMI Biding na ol i bin wanbel long ol wok mentens mipela i bin mekim long larim dispela haus i stap gut.

Long Januari 8, 2016 ol Helt Inspekta bilong NCDC i bin givim wanpela tok lukaut o tok save long pasim Pasifik MMI Biding bihain long ea kondisen bilong dispela haus i bin bagarap na ol wok manmeri i no bin pilim gut long stap long dispela haus.

Mista Mano i tok MRDC i bin painimaut pinis dispela asua long ol ea kondisen na taim ol i wok long stretim ea kondisen sistem bilong Pasifik MMI Biding, ol i bin kirap nogut long lukim dispela tok save i kam long NCDC.

“Taim mipela i kisim dispela tok lukaut long NCDC, ol wokman bilong MRDC i sindaun na toktok wantaim ol NCDC Helt Inspekta na tokim ol long olgeta samting i kamap long Pasifik MMI Biding.

“Ol wokman bilong MRDC i tokim ol wokman bilong NCDC long as bilong dispela asua na wanem samting mipela i wok long mekim long daunim moa hevi.

“MRDC i bin bungim ol tenen o ol lain husat i save rentim Pasifik MMI bilding na mipela i tokim ol long ol samting mipela i mekim long stretim haus na ol samting bilong haus long larim sefti bilong ol manmeri i stap gut,” Mista Mano i tok.

Mista Mano i tok ol kontrakta bilong ol i mekim gut na fiksman olgeta ea kon sistem long Pasifik MMI Biding na nau olgeta ea kon long dispela haus i wok gut.

“Dispela haus i seif na orait long ol manmeri i yusim,” Mista Mano i tok.

Em i tok MRDC i laik tok tenkyu long NCDC Helt Tim, ol tenent bilong tupela haus, ol kontrekta, na ol arapela lain husat i bin helpim na sapotim MRDC long stretim gen dispela tupela namba wan opis bilding long Pot Mosbi.

“Mipela i wok hat tru wantaim ol dispela lain long mekim ol mentenens wok na kirapim gen tupela Pasifik MMI na Pasifik Ples bilding long larim tupela i kamap moden opis bilding long Pot Mosbi,” Mista Mano i tok.



Pasifik MMI Biding

Bikpela pait long Tari taun, 6-pela man i dai

BIKPELA pait i kamap long Tari taun long Hela Provins na 6-pela man i dai pinis tasol i luk olsem namba bi-long polisman bai sot long stopim dispela pait.

Taim ekting Polis Stesin Komanda (PSC) bilong Tari, Daniel Yangen, i tokaut long rausim 50 polis manmeri husat i asua long brukim lo, bikpela pait i kamap long Kikita Namba 2 viles na dispela pait i lukim 6-pela man i dai long tupela sait wantaim.

Edministreta bilong Hela Provins, William Bando, i tok long Facebook pes bilong em long Tunde apinun, olsem ol manmeri i stap long Tari taun na lukim laip so bilong dispela pait.

Kikita Namba 1 viles i stap 1 kilomita tasol arere long Tari taun na i tok ol pablik manmeri long Tari taun i stap long Papindo na Homa ragbi fil na lukim pait olsem tru ol i lukim long piksa o muvi.

Olpele LLG kaunsil bilong Homa kaunsil wot insait long Tari taun, Hebe Piriko, i tok Kikita Namba 1 viles i bagarap olgeta bihain long tupela klen bilong Kikita yet i kamapim wanpela pait long las wik.

Mista Piriko i tok dispela pait i lukim 6-pela man long tupela sait wantaim i dai na ol man i kukim planti haus, katim kopi diwai na yar diwai na bagarapim gaden kaikai.

Kikita viles i stap long sait bilong Tari polis stesin na polis bareks. Narapela sait birua i stap long sait bilong polis bareks na narapela i stap long sait bilong polis stesin.

Wantok Niuspepa i bin traimit long kolim Tari Polis Stesin long telepon tasol telepon bilong ol i no wok.

Mobail fon bilong ekting Polis Stesin Komanda long Tari, Daniel Yangen, i no ring.

Long Trinde, wanpela senia pasto bilong ECPNG sios i tok ol polisman i hat

long stopim dispela pait na ol Kristen manmeri i wok long beten long larim Papa God i stopim dispela pait.


Pasto Michael Hawi i tok dispela pait i kamap klostu stret long Tari taun i ken kamapim hevi long long ol manmeri, ol pablik sevan na ol liklik pikinini na meri bikos ol hap katres i wok long flai kam long taun.

“Mipela i beten tasol. Ol lida man na polisman i hat long stopim. Mipela ol prea waria na Kristen manmeri stap arere long pait ples i beten strong,” em i tok.

Dispela pait i bin stat long las wik bihain long tupela man i bin dring bia na pait. Tupela spakman i pait na katim tupela yet go kam. Bihain ol wan lain bilong tupela i go kam na pait i kirap taim ol i kisim gan.

Ol i yusim ol strongpela faktori gan na pait. Ol i no moa yusim supia na bunara.

Tari bisnis manmeri wari long pait



Ol ICT lain, mi go malalo nau. Lukim yupela bihain, gutpela nogut tru!

OL bisnis manmeri long Tari, Hela Provins i wari tru nogut ol bai lusim bisnis bilong ol bikos bikpela pait i kamap arere long Tari taun stret.

Pait i stat long las wik na 6-pela man i dai pinis. Tari polis stesin i sot long polisman bihain long 50 polis manmeri i kisim tok save pinis olsem ol bai raus long polis fos bikos ol i brukim lo.

Ol bisnis manmeri long Tari taun i tok ol i no gat bilip long polisman bikos dispela pait i kamap arere long Tari taun stret na ol polisman i no gat strong bikos ol asples i yusim ol strongpela gan long pait.

Wanpela bisnisan bilong Saina na papa bilong Fu Qink Ko supamaket long Tari taun, Jimmy Chan, i tok em i pret long sefti bilong em yet, ol famili bilong em na sefti bilong ol wok manmeri bikos pait i kamap baksait long bikpela stua bilong em.

Fu Qink Ko em i wanpela bikpela stua na supamaket tasol long Tari taun. Sapos ol

man i brukim stua o kukim dispela stua, ol arapela manmeri bilong Hela bai no inap kisim sevis.

“Mipela i kam stap long givim sevis long ol manmeri tasol mi pret nogut dispela pait i bagarapim bisnis na sevis mipela i givim long Hela pipel,” em i tok.

Propeti Menesa bilong Menduli stua, Agali Henene, i tok stua bilong en i stap long sait bilong pait ples na em i pret nogut ol man i brukim stua bilong em, kisim mani na stua kago na kilim ol manmeri.

Mista Henene i tok ol i pasim stua long dispela wik Tunde taim ol i lukim olsem pait i go bikpela stret.

“Pait i kamap bikpela stret na mipela i hat long opim stua. Mipela pasim stua na tokim ol wok manmeri long stap long haus nogut sampela katres i abrus na kilim ol wokmanmeri na kastoma bilong mipela,” Mista Henene i tok.

Wanpela sekyuriti gad bilong Curtain Brothers long Tari

i tok em i pret long laip bilong em bikos pait i kamap klostu stret long banis bilong ol.

Dispela sekyuriti gad, husat i no laik tokaut long nem bilong em, i tok pait i kamap arere long banis bilong ol na ol manmeri long Tari taun i wok long lukim pait olsem tru em i kamap long piksa o muvi.

Narapela sekyuriti long wanpela nupela gest haus klostu long pait ples i tok olgeta kastoma bilong em i ranawe na em i no mekim mani long wan wik.

Ol dispela man i singautim Fainens Minista James Marape na Hela Gavana Anderson Agiru long salim sampela moa polisman o ami bikos long lukluk bilong ol, ol man bilong pait i holim strongpela faktori gan.

Wantok Niuspepa i bin ringim ekting Tari Polis Stesin Komanda, Daniel Yangen, long kisim stori na ripot tasol opis fon bilong polis stesin i no wok na mobail fon bilong em i no on.



Pot Mosbi em i kapital siti bilong PNG na planti manmeri long arapela ples insait long kantri i save ting Pot Mosbi i no gat ol gaden long planim kaikai bilong ples. Nogat, dispela tingting i no stret. Pot Mosbi i gat ol gaden insait long siti stret. Insait long siti yet, ol manmeri i save mekim gaden na planim ol kaikai. Dispela piksa i soim tupela yangpela meri i salim ol kaikai arere long Waigani gavman opis, we ol yet i planim arere long Nesenel Developmen Benk opis.

Connecting PNG and the world.

Call toll free 180 3444 for more information.

Air Niugini

www.airniugini.com.pg

Mananakele Sola PV Haus Lait Sistem i kamap



Stori na poto - Anare Matakiviti, Eneji Program Kodineta IUCN Oceania.

Intenesenel Yunion bilong Konsevesesn bilong Neitsa (IUCN) Eneji Program i kisim wanpela bikpela mak bilong en long taim em i tokaut long stat bilong Mananakele Sola Photovolotaiics (PV) Haus Lati Sistem projek.

Komyuniti bilong Mananakele i stap insait long Sentral Provins na em i no bin gat ilektrisiti na em i

save stap long paiawut na kerosin lait tasol. Ol 290 haus lain i amamas long kisim ol nuplea sola PV haus lait sistem olsem na ol i no kaunim wanem kain hatwok long i go long Pot Mosbi , long baim 20 lita kerosin em samting bilong bipo.

Wantaim PV haus lait sistem ol komyuniti bilong Manakele i tok promis long wan wan de bai ol ritim ol buk, mekim skul wok, mekim ol wok bilong haus, na wokim bisnis. Bikpela samting em long ol famili i stap seif na slip gut

long nait bikos ol i gat lait.

Kost bilong projek i sanap long mak bilong K570,000. Ol i wokim insait long yia 2015 aninit long Tag Holdings, wanpela lokal Papua Niugini kampani. Ol dispela 290 hauslain em Dipatmen bilong Petroleum na Eneji. Ol i opim dispela rurel ilektrifikesen rolaut plen na long Mande Febueri 1, 2016.

Sola PV lait sistem projek em i wanpela Eneji, Ikosistem na Sas-tenebel we bilong stap (EESLI) na em i kisim helpim i kam long Inte-

nesenel Yunion bilong Kosevesesn bilong Neitsa (UCN) na gavman bilong Itali, Austria, Luxembreg em i wanpela Eneji, Ekosistem na Sas-tenebel Laivilhud inisitev (EESLI). Intenesenel Yunien bilong Konsevesesn bilong Neitsa (IUCN) Eneji Program i fandim wantaim mani i kam long ol gavman bilong Itali, Austria, Luxembourg na Spen.

ICUN em i wanpela intenesenel yunien bilong konsevesesn bilong neitsa we i save helpim long painim ol gutpela wei bilong stre-

tim hevi bilong envairomen na developmen. Em i save mekim wok bilong baioadaivesiti, klaimet senis, eneji o pawa, laip bilong ol pipel na long sapotim ol saiens risets projek. Em i save bungim ol gavman, NGO, Yunaitet Nesen na ol kampani long kamapim ol polisi, lo and painim ol gutpela wei bilong developmen long wol. Em i gat moa long 1,000 gavman i memba long en na klostu 11,000 volantia save-man na meri insait long samting olsem 160 kantri long wol.

Galip inap kamapim mani



Galip ol i drain na pasim bilong salim i go long ovasis maket.



Galip i karamap long soklet.

Frieda Sila Kana i raitim

GALIP em i wanpela nupela kain kes krop insait long developmen bilong PNG tude. Dispela luksave i bin kamap long Nesenel Egrikalsa Risets Institut long yia 2001.

Ol ripot i kam long Dairekta bilong NARI, Dokta Sergei Bang i bin toktok wanpela konpres bilong lukautim mangro diwai long pinis bilong las yia long dispela diwai galip we em i tumbuna diwai i kamap klia nau olsem em i ken givim moa long ikonmik developmen long dispela taim.

Ol kibung na stadi risets olsem 2002 NARI Nesenel Konsaltesen, ACC Komese-laisesen Projek long 2003 (EU STABEX) we ol i bin lukluk long ol kain kain krop long Kerevat, Ekstenel Hotikalsa Industri Sekta Stadi 2003 we DAL eksenel konsalten, Andrew McGregor i bin wokim, na hevi bilong PNG kakao indastri i pundaun na ol fama wok long painim wanem narapela wei bilong wokim mani.

Ol dispela kain bikpela toktok pepa i soim olsem dispela tumbuna prut o nat diwai we ol pipel bilong PNG, Solomon Ailan, Vanuatu na Nu Kaledonia i save kaikai em inap kamap nara-

pela wei bilong ol pipel long ol komyuniti i kisim mani.

I gat ol fama long ol maunten bilong ol liklik ailan i gat ol diwai wantaim bikpela kaikai bilong en. Prut bilong galip em i wanpela kaikai bilong ol pipel na tu ol pipel i save yusim long wok bilong ol kalsa olsem long taim bilong wokim ol bikpela kaikai, stretim haus kraiss, baim meri na tu long senisim wantaim narapela kaikai. Em i save kamap olsem mani long stretim hevi bilong ol man o long ol tupela lain i bruk i ken kam sekhan na kamap wanbel gen. Galip nat i gat ol gutpela samting bilong en olsem namba wan kain oil, naispela teist, helti na nutrisius, bikpela protin na i gat vaiitamin. Em i ken kamap olsem marasin bilong stretim skin solap, rausim ol blut we i save pasim rot bilong gutpela win insait long bodi, na sampela moa gutpela samting.

Timba bilong galip diwai em i 'A' gret. Em i gutpela long envairomen na long wokim gaden na fam. Em i no save birua long graun na envairomen. Em i ken kamap wankain olsem ol narapela egrikalsa kes krop olsem kakao, kopi, pepa, vanilla na kava.

Mani mak we i save

kamap long galip long wan wan yia makim wantaim ol narapela kes krop em i go olsem; Kakao olsem wanpela bikpela kes krop inap kamapim K6, 000 long wanpela hekta long wanpela yia, na liklik lain galip olsem 39 diwai long wanpela hekta (16mx16m) em inap kamapim K4,600 long wankain taim.

Em bai kamapim dabol inkam sapos ol i bungim wantaim kakao olsem seid diwai. Em bai olsem K6,000 bungim wantaim K4,600 long wanpela yia em wanpela fama bai inap kamapim K10,600 long wanpela yia insait long wanpela hap tasol. Ol bikpela diwai galip tru em bai 139 diwai insait long wanpela hekta olsem (6mx12m) olsem em yet em inap long kamapim K16,600 long wanpela hekta insait long wanpela yia.

Dispela ol mak i soim olsem galip diwai i gat gutpela valiu bilong en. Na long ol ples we ol i no gat planti wei bilong kisim mani tasol ol i gat planti galip we i pundaun nating em ol inap long stretim na yusim olsem wei bilong kisim mani na helpim ikonomi.

Ol dispela toktok na ol piksa i kam long NARI long Lae, Morobe provins.

Australian Open

Djokovic i winim namba 6 taitel



NOVAK Djokovic i winim Australian Open taitel we dispela em i namba 6 taim bilong em. Em i bin daunim Andy Murray wantaim stretpela set long Rod Laver pilaia graun.

Djokovic i kisim 6-1, 7-5, 7-6 (7-3) na bungim rekot bilong Roy Emerson, husat i kisim 6-pela singel taitel bilong Australia. Djokovic i kisim dispela poin insait long tupela aua na 51-minit na daunim Murray long Sande nait.

Djokovic i rausim ol blok kwik long namba wan set egensim Murray we skoa i sanap olsem 6-1 insait long 30 minit.

Namba tu set i no wankain olsem namba wan we tupela i pait insait long 80-minit. Bihain, Djokovic i daunim Murray long 11 gem

we skoa i sanap olsem 7-5. Wankain tasol, Djokovic i daunim Murray gen long namba 3 set we poin i sanap olsem 7-6.

Long fainal set, Djokovic i painim strong bilong em kwiktaim na skoarim 7-3 na kisim wankain rekot bilong taitel bilong Australia..

"Mi rispektim Andy na tim bilong em long ol i gat bikpela na strongpela resis. Yu em strongpela sempion, bikpela poro na strongpela man, we yu save givim olgeta taim bilong yu long dispela spot," Djokovic i tok.

"Mi laik tok tenkyu long tim bilong mi. Yupela i save olsem wan wan tim mipela i save pilai long dispela kain bikpela resis em mipela i save gat narapela kain tingting stret.

"I gat bikpela astingting i

stap long wan wan de mipela i save stap long en. Wan wan man i gat ol plen bilong ol yet i stap long mekim. Mipela i bin i kam stap long hia inap 3-pela wik na tingting long mipela i kamap long dispela mak na winim dispela tropi na mi tok tenyu long yupela. Mi laikim yupela olgeta na tenkyu long sapot bilong yupela."

Murray i tok tenkyu na amamas long Djokovic long kisim wankain rekot bilong Australian Open taitel.

"Sikspela Australian Open taitel em i bikpela na Djokovic i fit stret. Em i bin kisim wankain poin long las yia na mi tok tenkyu tu long dispela," Murray i toktok long taim ol i bin mekim presentesen bilong dispela resis.

Djokovic i kamap strong long Melbourne



DJOKOVIC i kamap strongpela fos long pait hap bilong Melbourne, bihain long em i daunim Jo-Wilfried Tsonga long namba wan taim bilong em long bikpela taitel long yia 2008.

Em i bin daunim Rafael Nadal long epik fainal long

2012 na wantaim ol 4-pela win bilong em egensim Murray long 2011, 2013, 2015 na nau long 2016.

Djokovic i winim 21 resis tu long gran slam na em i no bin lus long ol bikpela pait bihain long Stan Wawrinka i daunim em long French

Open fainal long Roland Garros long las yia.

Taim Djokovic i strong yet gutpela kala bilong em, Murray i no gat gutpela rekot na em i kamap namba tu man long lus long 5-pela gran slam fainal long post-1968 OPEN Era.

Sempion long Australian Open, Angelique Kerber, klostu i lus



AUSTRALIAN Open wina, Angelique Kerber, i tok, klostu em i bin lus long namba wan raun bilong resis.

Kerber i win long liklik poin wantaim 6-7 (4-7), 7-6 (8-6), 6-3 bihain long 161-minute. Em i bin egensim wol wina namba 64, Misaki Doi, long resis we tupela i opim pilai.

Jeman i tok, "Pilai wantaim wanpela lek long stretpela hap i go long Jemeni" taim em i lus long namba tu set.

Tasol, dispela em i strongpela pilai kamap namel long tupela we em i kisim gutpela tingting long ol raun i

kamap bihain.

"Mi orait, bihain long winim namba wan raun. Nau mi no gat wanpela samting long lus," em i tokim ol nius lain bihain long em i daunim top pilai, Serena Williams, 6-4, 3-6, 6-4 long fainal long Sarere.

"Mi bin pilai gut long olgeta raun. Mi gat namba tu sans i stap na mi bai resis gut long dispela tupela wik na winim Australian Open."

Kerber i tok em i bin lainim gutpela skul toktok insait long tupela wik i mekim na em i yusim dis-

pela skul toktok long tu resis long kamap wina.

Bilip bilong 28 krismas, Kerber, i soim long pilai graun taim em stap pas, 3-2, egensim Williams long fainal set bilong resis.

Tupela i bin pilai long longpela taim na Kerber i bin senis sampela stail long daunim Williams.

"Mi ting taim bilong pilai i longpela na mi bin senisim sampela stail," em i tok.

Klostu long tupela i bungim pinis bilong pilai, Kerber i kisim 6 poin na Williams i kisim 4 poin.

Kerber i amamas long Williams i wanbel long em i lus



DISPELA em i namba wan taim bilong Williams long em i lus long Australian Open fainal, tasol em i amamas long em i lus.

Williams i raunim net kwiktaim bihain long resis long tok tenkyu long birua pilai bilong em na soim amamas tru long bel we Kerber tu i amamas long wan-

bel pasin bilong Williams.

"Yu yet soim olsem dispela kain pasin i gutpela tru," Kerber i tok.

"Williams i kamapim histori na em i amamasim planti pipel. Wanem samting em i mekim em bikpela tumas."

Long namba 7 sit long Melbourne, Kerber bai kisim namba tu ples long Monday,

na rausim Williams.

Williams i amamas na em i no wari liklik long em i bin lus.

"Mi bin kirap nogut long em i win na mi amamas long em i win," Williams i tokim ol nius lain.

Kerber i tok em i amamas long win, tasol dispela em i isi. Em i lukluk long winim sampela moa resis.



Usino-Bundi pipel mas holim pas gutpela senis na divelopmen

OL PIPEL bilong Usino-Bundi long Madang i kisim strongpela salens long kamap papa bilong ol gutpela wok divelopmen i kamap long ilektoret bilong ol, na no ken sindaun tasol na wetim mani long kam long Gavman.

Ol rot long muv fowet long lukim gutpela senis i gutpela edukesen, lukluk long sait long bisnis, helpim ol bisnis divelopmen na lusim tingting long pasin tumbuna we i no gutpela long divelopmen.

Ol dispela salens i kam long tupela asples man bilong Usino-Bundi yet em Jimmy Uguro, husat em eksekutiv opisa bilong Madang Provinsal Gavman na Edward Mangarua Kiza, em wanpela bisnisman bilong distrik yet.

Mista Uguro na Mista Edward i bin stap long wanpela lonsing seremoni long Uria wiles long Sande, Januari 31 we i lukim lonsing bilong Wekumara Poltri Projek trening woksop.

Dispela wanpela wik woksop i stat long Mande, Febuaei 1 na bai pinis long tumora Fraide Febueri 5. Em wanpela patnasip wok program namel long Wekumara Poltri o Kakaruk Projek, Madang provinsal gavman aninit long Dipatmen ov Egrikalsa na Laipstok (DAL) na Ramu NiCo Menesmen (MCC) long kirapim gutpela sindaun insait long komyuniti.

Ol eria o topik bilong dispela trening woksop em long poltri prodaksen, invesmen sasteinabiliti na fam entaprais menesmen. Moa long 40 man na meri bai kamap long dispela woksop long ol asples olsem Sumao, Mopo, Garia, Iwaiwa na Uria insait long Sumogaria Sensus Divisin,

Ward 19 long Usino LLG.

“Mipela i no gat planti Usino-Bundi pipel long gavman na bisnis we i save wokim samting bilong distrik bilong yumi,”

“Mi laik lukim planti lain bilong yumi i go insait long wok bisnis, go long bikpela skul na bringim moa gutpela divelopmen i kam long distrik bilong yumi. Yumi no ken sanap long sait tasol na lukluk i stap,” Mista Kiza i tok.

Mista Kiza yet em wanpela pastaim pablik sevan na nau em bisnisman na papa bilong Tamane Geshaus long Madang taun.

Em i tok tenkyu long Ramu NiCo Menesmen (MCC) long ronim dispela trening woksop na i givim K500 mak bilong kaikai i go long komyuniti long hap..

Mista Uguro i makim maus bilong Madang Provinsal Edministresen long luksave long dispela trening woksop.

Em i tokim ol asples pipel long lusim ol pasin tumbuna we i wok long stopim wok divelopmen long sait long famili, komyuniti na provins.

“Yupela ol Begesin yet mas senisim ples, i no ol narapela lain. Mi salensim yupela ol yangpela man na meri long lusim tingting long dring bia, yawa na smok mariwana na ol pasin kastom we i no gutpela na senisim pasin na lukautim famili na sosaiti bilong yumi,” Mista Uguro i tok.

“Sapos yupela i no senisim pasin bilong yupela, yupela bai bringim Usino-Bundi i go baksait tru long sait long divelopmen,” Mista Uguro i tok.

Em i makim maus bilong Madang provinsal Gavman na tokaut long givim K2,000 long sapotim ol.

“Yupela stap klostu tru

long bikpela haiwe rot na ol skul, tasol olsem wanem na yupela no senis yet. Sapos kastom pasin bilong yupela i wok long stopim yupela, orait yupela mas stat senis nau,” Mista Uguro i tok.

Ramu NiCo Egrikalsa supavaisa, Allan Wahwah, husat bai go pas long trening woksop long Uria wantaim wanwok bilong em, Aldam Bande, Munia Lurang na Samuel Masawa i tok tenkyu long ol pipel long askim Ramu NiCo long givim trening long bringim ap stendet bilong ol.

“Mipela long Ramu NiCo i amamas long wok bung wantaim Wekumara Poltri Projek, bikos mipela i bilip taim yumi wok bung wantaim yumi ken bringim kamap gutpela sindaun na gutpela senis insait long komyuniti na famili bilong yumi,” Mista Wahwah i tok.

Allan i tok Ramu NiCo em i no kam tasol long wok main tasol i gat risponsibiliti o wol long kamapim gutpela sindaun insait long famili na sosaiti.

Wanpela lida man, Mista John Kotii tok pasin kastom tasol bilong ol Begesin tasol i daunim planti gutpela wok divelopmen and gutpela senis i laik kamap long Begesin na Usino LLG.

“Wok bilong Sios na gutpela edukesin tasol bai senesim mipela tasol pastaim, mipela i mas lusim kastom pasin bilong mipela na bihainim tok tru insait long Baibel,” Mista Koti I toktok.

Moa long 40-pela manmeri bai stap insait long dispela trening woksop. Long tumoro Fraide bai i gat greduesen na tu bai lukim ol opisa bilong Nation-wide Micro Bank i go opim wan wan pasbuk akaun bilong ol lain i stap long trening.

Mista Kiza - Usino-Bundi lain i mas skul strong na kamapim wok bisnis.



Mista Uguro i katim riben na lonsim dispela woksop.



Mista Kiza, pikinini Bundi na Mista Uguro, pikinini Usino.



Sampela bilong ol pipel husai i stap insait long woksop.



KBK Mining

135 KM Slurry Pipeline



BSK Refinery

Pul resis bilong Ipatas Kap bai kamap



Pasim bal Kwik: Piksa i soim Hohola Flies na Difens i bin pilai long Murray Bareks pilai graun. Wanpela pilai bilong Hohola Flies i pasim bal i go long poro pilaia bilong em taim birua pilaia bilong em i kam long baksait na i laik nekem em. Piksa: Nicky Bernard

Lepa i stopim Ipatatas Kap salen long Bogenvil

Philemon Tame i raitim

Sif Eksekutiv Opisa bilong Coca Cola Ipatas Kap (CCIC), Timothy Lepa, i stopim ragbi salens long Otonomas Rijon bilong Bogenvil bikos i no gat gutpela toktok i kamap namel long Papua Niugini Ragbi Futbol Lig na ol opisal bilong CCIC.

Lepa i tokaut olsem em i stopim CCIC salens long Bogenvil long Murray Bareks long las wik Sarere taim ol i lonsim Sauten salens.

"Mi traim long toktok wantaim ol dairekta bilong PNGRFL husat i save stap pas long Bogenvil Ragbi Lig long tokim mipela long ol afiliet klap bilong Buka, tasol i no gat wanpela i sanap long toktok na mipela i stopim," Lepa i tok.

Lepa i tok, bod bilong Ipatas Kap i stopim Namatanai salens tu, bikos long wankain hevi bilong Bogenvil.

"Tasol, i gat narapela kap salens bai kamap long Niug-

ini Ailans loing Kimbe, Wes Nu Briten, we ol bai hostim ol gem long Mas 3 inap 5," Lepa i tok.

Em i tok moa olsem Momase salens we ol i bin makim long kamapim dispela pilai long Wewak, Is Nu Briten, em ol i skruim i go long Lae bikos planti tim i no rejista yet.

"Mipela i gat gutpela namba bilong tim long Madang, Ramu, Kainantu na Lae i redi pinis long resis long dispela salens long dispela wiken," Lepa i tok.

Philemon Tame i raitim

OLGETA pul resis bilong Ipatas Kap long Murray Bareks bai kamap long dispela wiken.

Ol pilai-of na fainal bai kamap long Sande long lukim husait bai kisim tupela gol pas long go pilai long stej namba tu long Lae.

Long las wiken pilai, Okuk Bomana Yunaitet i soim tru kala bilong ol taim ol i ran i go insait long pilai graun long Murray Bareks long Sarere.

Long pul C bilong Ipatas Kap, ol bek rowa bilong Bomana i sapotim gut ol fowad bilong ol na ol i putim tupela trai long namba wan hap bilong pilai.

Clement Kawage i putim kik bilong tupela trai wantaim i go insait.

Birua tim bilong ol, 6 Mail Tigers, i traim long soim strong bilong ol long namba tu hap bilong pilai, tasol ol i mekim planti asua long ranim bal.

Ol i traim hat yet na ol i putim wanpela trai long wing tasol taim i sot.

Ol Bomana i kisim moa strong taim ol i win long Sarere na long Sande ol i daunim ol 6 Mail Storms, 8-4.

Long pul A resis, Freeway Bumpers i skoarim tupela trai na daunim ol 5 Mail Watchdogs, 12-4 long Sarere na ol i daunim ol Dep Tigers, 6-4, long Sande.

Long pul B, nupela tim,

Aliyah Saints, na Bang 36 i bin kisim wankain poin, 12-12 long Sarere, na Saints i daunim Badili Warakos, 18-4 long Sande.

Long pul D, Hohola Flies i daunim ol 4 Mail Cats, na long Sande, ol i daunim ol 2 CT Rabbitohs wantaim wanpela poin 7-6.

Ol Vanuatu Dust i daunim ol Saraga Survivors wantaim tupela poin, 10-8, long Sarere na ol i kisim wankain poin wantaim birua tim bilong ol, 4 Mail Cats, 4-4, long Sande.

Sponsa bilong Ipatas Kap na Gavana bilong Enga Provins, Peter Ipatas, i stap long Murray Bareks pilai graun long Sarere long Lukim tupela gem.

Wai i tok aut

...namba tu traim pilai bilong Lagatois bai kamap

Philemon Tame i raitim

Ekting Siaman bilong, Nesenel Kapitel Distrik Sabeben Lagatois, Peter Wai, i tok aut olsem namba tu traim pilai bilong go insait long Digicel Kap bai kamap long Sande long Kone Tigers pilai graun, Waigani.

Wai i tok, 4-pela tim bai resis long raun tu traim pilai em tim Is, Wes, Not na Saut we ol i bin makim bihain long namba wan raun traim pilai i kamap namel long 8-pela tim long tupela wik i go pinis.

"Ol pilaia bilong IS NA Saut i yusim Kone Tigers pilai graun olsem trening hap bilong ol. Tim Wes i yusim Ipi Pak long Hohola na Tim Wes i yusim unagi pilai graun long Gordons olsem trening hap bilong ol. Tren-

ing i stat pinis na em bai pinis inap long Sarere," Wai i tok.

"Olgeta pilaia husat ol i makim pinis i ken go long wan wan trening hap bilong ol olgeta taim."

"Plen bilong kisim nupela tim i go insait long Digicel Kap resis long dispela yia bai karim kaikai," Selekta bilong Lagatois, Rocky Banda i tok.

Banda i tok kliia long dispela bikos planti lain i tok olsem Lagatois i no bungim mak bilong go insait long Digicel Kap.

"Planti lain i tok, Lagatois i no gat inap sponsasip na tu, em i no gat wanpela asples pilai graun long go insait long resis bilong Digicel Kap, tasol mi tok kliia olsem dispela plen bai karim kaikai," Banda i tok.

Dispela tim bai kisim ol pi-

laia bilong Pot Mosbi Sabeben lig, husat ol i pilai long Kap bilong NCD Gavana long Disemba, 2015.

"Mipela i traim long givim namba tu sans, insait long spot, long ol yangpela man husat i stap long siti wantaim no gat gutpela wokmani," Banda i tok.

"Tok baksait bilong pablik lain bai no inap long helpim ol yangpela. Mi laikim ol lain long stopim dispela kain toktok na traim long helpim ol yangpela.

"Mi laikim ol pilaia husat i pilai long traim pilai i mas pilai strong bikos ol bai go insait long fainal seleksen lista bilong Lagatois na tim bai soim namba wan kala bilong em long go insait long 2016 Digicel Kap. Lus tingting long ol toktok we pablik lain i toktok."

Wolff i sevim EHF EURO gol bilong Jemani

GOLKIPA bilong Jemani long Jeman All-Star tim, Andreas Wolff i savim 16 sot bilong Jemani long winim tropi.

Namba tu taim bihain long 2004, Jemani i kamap namba wan long EHF EURO reisis bilong ol man.

Jemani i isi tasol daunim ol Spein wantaim liklik skoa, 24:17 (10:6) long fainal long Sande long TAURON pilai graun na kisim tropi.

"Dispela em i wanpela amamas resis wantaim stronpela banis na (Andreas) Wolff i strong we Spein i no gat wanpela sans. Wanpela stronpela gem i kamap long namba wan minit inap long las minit," Carsten Lichtlein bilong ol Jemani i tok.

Wolff em astingting long

ol Jemani i daunim ol Spein na ol i lus long EHF EURO fainal. Bipo, Spein i bin lus taim ol i bin resis wantaim Sweden long 1996, wantaim Rasia long 1998 na wantaim Frans long 2006.

Long yia 1994, Sweden i daunim Russia, 34:21 na long 2014, Frans i daunim Denmark wantaim 41:32.

Ol Jeman i win na kisim sempionsip plet, na ol i kisim dairek tiket tu long go long 2016 Olimpik Gems. Spein na Croatia i kwalifai pinis long 2017 Wol Sempionsip long Frans.

"Tingting bilong mi i kirap long stedium bikos mipela i laik kwalifai long Olimpik. Mi i amamas long mipela i kwalifai bikos dispela em i driman bilong mi na nau em i karim kaikai," Lichtlein i tok.



Yangpela Gigira Laitepo FC bai lait



GO LONG WE: Golkipa bilong Gigira FC i kalap long kisim bal taim wan pilaia bilong em i pasim Erema pilaia. Poto Nicky Bernard.

Nicky Bernard i raitim

YANGPELA Gigira Laitepo United FC i gat sans long stap insait long top 2 lata bilong Telikom Nesenel Soka Lig long Sauten, sapos ol winim pilai bilong ol long dispela wiken.

Gigira, Pom na Rapaton FC i stap long wankain long poin lata wantaim wankain skoa bihain long Hekari long Sauten resis bilong NSL.

Ol yangpela Gigira i gat bikipela sans long stap long namba tu long poin lata sapos ol winim ol boi bilong Galp long las wiken, tasol dispela sans bilong ol i popaia bihain long Galp Erema i kam bihain long tripela minit bipo long pilai pinis long skoa long mekim ol dro 1-1.

Rapaton wantaim PS United tu olgeta bikipela sans long stap long namba tu ples long lata tasol tupela tim wantaim i strong sait bilong ol na dro tu 1-1.

Pom FC i mekim ol Hekari

United i sotwin taim ol pilai long Sande. Hekari go pas long skoa long namba wan hap, bihain ol kam bek na skoa gen taim ol Pom FC i slip liklik long bek lain bilong ol.

Pom FC i strong na bipo ol go long malolo long hap ol skoaim wanpela gol long mekim 2-1 na ol go malolo long hap taim.

Tupela tim wantaim i no skoa long namba tu hap bilong pilai, Pom FC i strongim banis bilong em gut tru na ol namel man bilong Pom FC i stat long wok hat long kontrolim bal na givim long ol fran lain bilong ol.

Hekari i silek liklik long 10-pela minit bipo long pilai i pinis we ol Pom FC i wok long stap long mak bilong ol tasol, dispela i mekim ol Hekari pilaia i senis pilai bilong ol long atek i go long difen long mak bilong ol.

Hekari i kam aut wina long ful taim na dispela mekim ol long stap klia olgeta long poin lata bilong Sauten NSL resis.

Dispela wiken Pom FC i mas win long kisim ples long namba tu long lata na ol mas winim bikipela long poin everis.

Ol yangpela Girira Laitepo tu mas strong long winim pilai bilong ol sapos ol i laik stap yet long resis bilong Telikom Nesenel Soka Lig.

PS United na Rapatona i mas senis pilai bilong ol tu na putim planti presa long narapela tim na winim gem wantaim bikipela skoa long kisim poin everis long kisim spes long namba tu ples bilong Sauten resis.

Dispela wiken bai Bisini soka graun bai pas long ol sapota long singaut long tim bilong ol long winim gem long kisim namba tu ples na joinim Hekari long wetim tupela top tim bilong Noten resis.

Dispela wiken tu bai las raun bilong Telikom Nesenel Soka Lig na tupela top tim bai pilai wantaim tupela top tim bilong Noten resis we ol save pilai long Lae.

Cole i nidim sapot

KOSA bilong ol meri Papua Niugini, Lisa Cole, i nidim sapot bilong ol Stekholda long helpim em long hostim 2016 FIFA Anda-20 Wol Kap bilong ol meri long Pot Mosbi klostu long pinis bilong dis[pela yia.

Em i bin mekim dispela toktok taim em i tokim wanpela patna bilong PNG Futbal Asosiesen, PNG Spot Faundesen, long wok redi bilong tim.

"FIFA Anda-20 Wol Kap resis bilong ol meri em i no wanpela liklik spot. Em i bikipela resis bilong ol meri husat i save pilai futbal, na em i nidim sapot bilong olgeta lain," Cole i tok.

"Em i no wanpela samting bilong mi yet, ol wokman bilong mi o PNGFA, nogat. Em i laikim olgeta manmeri bilong PNG long sapot na mipela bai winim dispela resis."

Cole i tok, PNG Anda-20 tim bilong ol meri bai yusim Nesenel Institut bilong Spot long Goroka olsem bes hap bilong ol inap 2016 2016 FIFA Wol Kap bai kamap long Novemba o Disemba.

Long ai bilong ol nius lain, Cole i tokim Siaman bilong PNG Spot Faundesen, Graham Osbourne, Eksektiv

Dairekta, Peter Tsiamalili, na Dairekta bilong NSI, Janet Gimot, long wanem kain ol namba wan wok institusen i ken mekim long sapotim anda-20 soka tim bilong ol meri.

Gutpela samting bilong hostim Wol Kap resis i bikipela tumas we em bai karim planti gutpela samting i kam insait long kantri olsem long ikonmik, turisim, na infrastraksa. Em bai i gat bikipela senis long sosel sait taim ol meri i pilai long wol gem resis long PNG.

"Em i no wanpela liklik resis na ol ogenaizing komiti bilong PNG i laikim wanpela stedium bilong dispela bikipela futbal resis i kam long dispela kantri," em i tok.

Bipo Golkipa bilong US i tok moa olsem wok bilong em long strongim toktok namel long ol pilaia, papamama na kosa.

Nau PNGFA i no gat data bes bilong olgeta meri pilaia, na em i laik lukim ol i ken stretim dispela taim em i stap long hia olsem kosa bilong anda-20.

Kosa i tok moa olsem ol i laik kamapim wanpela gutpela envairomen namel long anda-20 meri tim.

Hunters i redi



Saut Pasifik Breweri i bin givim K7, 657, 650 i go long Hunters long las wik. Dispela em i bikipela sponsa we SPB i mekim. Piksa i soim ol wokman long PNGRFL, wokman bilong SPB na Minista bilong Spot, Justin Tkatchenko i bin sanap wantaim taim SPB i givim dispela sek.



Noel Zeming, husat bai go pas long ol Hunters long pilai bai kamap namel long Hunters na Penrith Panthers Sarere, i sanap wantaim ol wokmeri bilong SP Breweri taim SPB i givim bikipela mani long PNGRFL long sapotim ol Hunters. Ol piksa: Nicky Bernard

Philemon Tame i raitim

PAPUA Niugini Hunters i redi pinis long pait wantaim Penrith Panthers long Sarere, long Nesenel Futbal Stedium.

Noel Zeming, husat i save kisim planti skoa bilong Hunters, bai kamap kepten bilong Hunters.

Kosa bilong Sp Hunters, Michael Marum, na Sif Eksektiv Opisa bilong, Nesenel Ragbi Futbal Lig na Hunters, Bob Cutmore, i tok strong olsem Zeming bai go pas long ol Hunters.

Zeming i go wantaim Marum long Saut Pasifik Breweri (SPB) taim SPB i toksave long multi-milien kina sponsasip em bai mekim long Hunters.

"Noel i stap yet long de namba wan na em i save toktok gut, na ol tim poro bilong em i save rispek long em," Marum i tok.

Zeming wantaim Thompson Teteh, Esau Siune, Adex Wera, Bland Abavu, Wartovo Puara Jr, Brandy Peter, na Korave em ol namba wan pilai long yia 2014 yet.

Namba wan kala bilong Zeming long kik, strongim banis na em i save kontrolim bal namel wantaim senta pilaia Teteh, na winga, Wera, long Tim Lahanis long Digicel Kap i mekim na ol i makim em long namba wan taim.



BAI YU GO WE: Kap fainal bilong ragbi yunien 7s long Bava pak.



KETSIM MI: Lida man bilong gol, Kori, i abrusim pilai bilong POM FC long Sande pilai bilong ol. Kori i putim tupela gol long bringim tim bilong em Hekari i go pas long poin lata na tu win long pilai bilong ol long Sande. 2-1.



KAM KLOSTU: Pilaia bilong Haliquens wantaim bal i traim long ronawe long pilaia bilong Spatens long ragbi yunien fainal bilong ol meri.



KAIKAI DAS: Pilaia bilong Yokomo i wel long namba tri bes taim pilaia bilong Bears i traim long autim em long A gret pilai bilong ol man long Sande.



MI TRAIM YET: Yangpela winga bilong Gigira FC, July wantaim bal i traim gol mak bilong Erema long NSL pilai bilong ol long Sarere. Tupela tim i dro 1-1.



TIM LAMANA: Netbal tim bilong Lamana i redi long go insait long ples bilong pilai long Praivet Netbal resis.



DIANA

Tuna

Niupela Swit Teist
Nau Igat Moa Oil!



PNG's ORIGINAL TUNA

Manufactured by:
RD TUNA CANNERS LTD.

Nicky Bernard i raitim

WANPELA yangpela swima bilong Boroko Swiming Klap i helim komyuniti bilong em wantaim ol ragbi bal.

Rexford Tony Bernard Junia i gat 16 krismas na em miks Manus na Barakau na em i go helpim ol pikinini bilong Barakau wantaim ol ragbi bal we em save kolektim long PNGRFL.

Rexford em save pilai resis long swim wantaim klap bilong em long Boroko, long taim bilong malolo bilong swim em stap nating long haus na em wantaim ol poroman bilong em i save pilai ragbi tas.

Dispela i mekim wanpela bikman bilong PNGRFL i givim ol sampela bal long pilai wantaim. Rexford i kisim sampela bal bilong em na go putim long haus. Dispela tingting bilong em long go givim ol komyuniti bilong em long Barakau i pas strong long tingting bilong em. Long wanem em i save lukim ol yangpela mangi long Barakau save pilai long ol olupela bal.

Long wanpela apinun em lukim bikman bilong PNGRFL na askim em sapos em i ken givim sampela moa bal long karim go long ples bilong mama bilong em na givim long ol wan krismas bilong em na ol bikipela husat ol gat ragbi kompetisen.

Bikman bilong promosen bilong PNGRFL i wanbel long tingting bilong Rexford na em givim

Swima helpim komyuniti



Poto Nicky Bernard

TOP MANGI: Rexford(wait t/sot) i givim bal i go long seketeri bilong Barakau Ragbi Lig Asosiesen.

sampela moa bal long em.

"Dispela ol bal em bilong promosen long givim long ol pikinini na ol yangpela long holim na pilim ragbi bal na bai olsem save long wei bilong tromoi o pasim bal. Na yu askim long givim long ol yangpela ol mangi long ples em gutpela promosen yu mekim" Bikman bilong PNGRFL i tokim Rexford.

Rexford i tokim bikman bilong PNGRFL olsem em save pilai long swimming na ol brata bilong long ples long Barakau em ol lain bilong pilai ragbi na dispela ol bal i go long ol bai mekim ol amamas moa long pilai ragbi.

Long Sarere Rexford na mama bilong em karim ol bai go na givim long ol komyuniti long Barakau. Na long kisim dispela ol bal Seketeri bilong Barakau Ragbi Asosiesen i kisim ol dispela bal long makim ol komyuniti bilong ol Barakau.

Em tok tenkyu long Rexford long tingim ol yangpela mangi long ples na kisim ol dispela bal kam na tu em tok tenkyu long PNGRFL long dispela pikinini program na promosen.

Em tok Barakau 9s bai kik ov long dispela mun taim olgeta ruls bilong pilai bai redi na amamas tim bai resis long dispela kompetisen.

Rexford tu i statim gen swimming trening bilong em wantaim Boroko Swiming Klap bilong em long redi long sampela bikipela kompetisen bai kamap long dispela yia.

➔ Treated Mosquito Nets PREVENT Malaria

➔ Visitect TESTS for Malaria

➔ Arterakine

Tablets TREAT
Malaria

Good Products, Better Prices, ikam long

 Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg